


# KGAKGAMATŠO

 Le ka dula. Ke be ke letile nako ye telele go tla morago godimo mo ka Phoenix. Ka nnete ke thabile morago ga sekgalela se go ba mo. Ge ke le ka Phoenix, go na le se sengwe ka yona, ka mehla se ntira go ikwela gore ke dutše magareng ga batho ba e lego bagwera ba ka, ba ba nthatago. Gomme—gomme ke bagale ba thapelo ba tšwa mo go nthapelela, lebaka la mengwaga. Ka mehla ke gopola kopano ya pele ye ke bilego nayo mo le Ngwanešu Outlaw, Ngwanešu Garcia, le badiredi mo ba toropokgolo. Ka fao Morena a šegofaditšego ge ke be ke sa le ka bosweng bja dikopano! Ge e sa le nako yeo, Phoenix e swere bogolo. . . Sengwe ka pelong ya ka, seo se lego bothata go hlalosa.

2 Bjalo ka mošemane yo monnyane, ka mehla ke be ke nyaka go tla Phoenix. Ka mehla ke badile ka leganata. Ke bile le sereto se sennyane se ke se dirilego ka yona, ge ke be ke sa no ba mošemane yo monnyane, ka Arizona.

3 Ke thaba kudu go ba mo—mo modudi wa setlogo bjale. Ke a thanka nka no ba e ka ba ngwaga bogolo, gomme mohlomongwe go feta gannyane. Eupša ga o hwetše bontši kudu bogologolo kudu go feta fao. Mang le mang ke kopanago le yena, ke re, “A o modudi wa setlogo?”

“Gabotse, bontši bjo bo lego gona. Ke bile mo botelele bjalo.”

4 Gomme—gomme ke a nagana ke tla swanela go ya go lefeloboloto la Apache, goba felotsoko, go hwetša modudi wa setlogo wa kgonthe.

5 Gomme yo mongwe o rile, e sego telele go fetile, o rile, “Ngwanešu Branham, o rata Arizona bjang?”

6 Ke rile, “Gabotse, ebile ye tee ya ditlhologelo tše kgolo tša nako ya bophelo bja ka, go—go dula ka Arizona, gomme Modimo o mphile yeo.”

7 Re mo feela pele ga khonferense ya Banna ba Kgwebo, ye e bilego selo sa ngwaga ka ngwaga go rena. Gomme morago ga sekgalela se, ge re kgobokane mo bakeng sa pele ga go ba mmogo pele ga khonferense ye e thomago Labone bošego, ke a dumela. E bile monyetla wa ka, lebaka la ya go feta—ya go feta mengwaga e se mekae, go tla go ba le dikopano tše nnyane tše tikologong, pele kopano ya kgonthe e thoma ka. . . goba khonferense, a ke re, e thoma.

8 Gomme Ngwanešu Williams ke mogwera moratwa yo mo bjalo kudu, yena le Kgaetšedi Williams. Ka kgonthe ke na le lefelo le borutho ka pelong ya ka bakeng sa batho bao. Ba

ntaletša morago kgafetšakgafetša, gomme ka fao re thabile go phethagatša taletšo yeo morago ga sekgalela se.

<sup>9</sup> Gape godimo ga sefala, Ngwanešu Fuller, Ngwanešu Jewel Rose, le Ngwanešu Tony Stromei go tšwa Tucson, le Ngwanešu Borders molaodi wa lesolo la rena. Le ngwa—ngwa ngwanešu wa go loka wa kgale yo bohlokwa, Arganbright, re bile mmogo ka dintweng tše ntši tše thata. Ka lehlakoreng le lengwe la noka; ke leta go dula le yena ka lehlakoreng le lengwe la noka ye kgolo letšatšitsoko.

<sup>10</sup> Ga ke kgone go nagana leina la ngwanešu, ke lekile. Leina la gago o mang, ngwanešu? [Ngwanešu o re, “Al Booher”—Mor.] Booher, Ngwanešu Booher. Ke—ke tseba sefahlego sa gagwe. Gomme a ga se wena gape wa go hlathollela nako ye nngwe. . . . [“Go hlathollela difoa.”] bakeng sa difoa. Seo ke. . .

Gomme re thabile kudu go ba le lena bohle mo.

<sup>11</sup> Ke be ke no lebelela fase mo pele ga ka, gomme ke bona ba bangwe ba bagwera ba ka tsela yohle go tšwa Arkansas, mo. Ge ke be ke le mo lekga la pele, ke le boditše gore mogohle ke ilego, ke hweditše yo mongwe go tšwa Arkansas. Ke na le nnete, ge ke fihla Legodimong, Ke tla hwetša ba bangwe kua go tšwa Arkansas, ka gobane ka kgonthe ba bile ba go tshepega, batho ba go botega.

<sup>12</sup> Gomme bjale, ka mehla ke bolela nako ye telele, eupša ke lekile bokaonekaone bja ka go ba mohuta wa go dira Mangwalo a ka le noutse gore ke se bolele botelele kudu. Gomme ke nyaka go rapelela balwetši ge ke sa le ka Phoenix.

<sup>13</sup> Bjale, Molaetša wo ke. . . Morena a nkabetšego wona, dinako tše dingwe o, le a tseba, dilo tše di kgwatha botse. Gomme go bile ka tsela yeo ka lebaka le lengwe le le lengwe. Gomme ke lekile bokaonekaone bja ka go dula le Wona. Ke selo se sengwe. Gomme Ge ke se ka bolela selo se Modimo a mpoditšego, gomme ge se be se le—e se sa Modimo, gona O. . . se be se ka se be ka Lentšung. Eupša ge se le ka Lentšung, le tshepišo ya iri ye, gona ke ikwela gore ke dira se se lokilego, ka gobane ke no leka go boloka se A se tshepišitšego iri ye.

<sup>14</sup> Gomme makga a mantši ge o kopana le yo mongwe ka go thutamodimo ya bona, ba tla wela ntle le wena, thwi ka pela. Eupša seo ga sa swanela go ba. Ke leka go. . . Ke hwetša bagwera ba ka ba e lego ba tšohle dikereke tša kereke ya leina tša go fapana, le go ya pele, ga se ke tsoge ka wela ntle le bona baena. Nna, ke ya dikerekeng tša bona, mogohle ba ntumelela go tla, le go bolela. Eupša ga ra swanela go wela ntle, godimo ga mebono ye mennyane.

<sup>15</sup> Eupša, le a tseba, ge ke boletše e ka ba eng ya go fapana go feta se se lego ka pelong ya ka, ke tla ba moikaketši. Gomme ke—ke. . . Seo a se be kgole! Ke tla swanela ke go kopana le Yena letšatši le lengwe, bjalo ka modiradibe, eupša ke nnete ga ke

nyake go kopana le Yena bjalo ka moikaketši. Eupša ke nyaka go ba therešo. Gomme ge ke nno re, “Gabotse, ke tla no tlogela Se ka gobane ka moka ga bona ba dumela *se, sela,*” gona ke motho wa mohuta mang? Le ka se be le boitshepo ka go nna, gomme nka se be le boitshepo ka go Modimo goba ka go nnamong, ge ke no itšimeletša bonolo bjalo.

16 Yo mongwe le yo mongwe o swanetše go ba le se sengwe se o nago le nnete ka sona. Gomme seo ke ge o ka thea tumelo ya gago, ke ge o na le nnete. Eupša go fihla o eba le nnete, ge go na le potšišo, se tlogele se nnoši go fihla o eba le nnete.

17 Bjale Billy go molaleng o file ntle dikarata tsoko tša thapelo, tšeo ke naganago o . . . Ya, ke mmoditše go dira. Gomme ke a dumela o mpoeditše, lebakana la go feta, gore o dirile. Felotsoko go bapela kua, ke tla bitša ba se nene go tla mothalong wa thapelo, morago ga lebakana, go rapelelwa. Gomme ge karata ya gago e se ya bitšwa . . . Ge—ge e biditšwe, a ke re, gomme ga o ne nnete gore Modimo ke mofodiši gomme O ya go go fodiša, go ka se go dire botse go tla godimo mo, gobane o ka se fodišwe. Wena, ge go na le potšišo e tee, o re, “Gabotse, bjale, ge go na le sengwe ka bophelong bja ka, ka kgonthe ke swanetše go otlolla se godimo,” eya o lokiše seo, pele, gomme morago o tle morago go mothalwa wa thapelo, le a bona.

18 Ka gobane, phodišo ke borotho bja bana. Re lemoga seo. E ka go poelano, gomme poelano pele e šomišwa ka disoulong tša rena. Gomme phodišo ka mehla e bile pulamadibogo ya molaetša wo mongwe le wo mongwe, gomme gape e bile mokgwa wa go kgobela batho mmogo. Gomme ke . . .

19 Batho ba bantši ba tla thekga kopano ya phodišo ka tšhelete, ba bantši ba tla tla kopanong ya phodišo, goba moketeng wa koša, eupša ge go etla go soulo ya go šokiša ya go lahlega go phološwa, ga go batho ba bantši ba nago le kgahlego ka go yeo. Ba no . . . Eupša seo ke kgwekgwe. Phodišo kgethwa le mekete ya go opela, le go ya pele, e no ba . . . Bjalo ka ge Ngwanešu Bosworth a fela a bolela, “Ke tšeletši godimo ga huku.” Gomme o laetša hlapi tšeletši, e sego huku.

20 Gomme seo e no ba selo, go dira batho go theetša lebakana, go fihla ka kgonthe o ka ba neela molaetša wa gago. Modimo o dirile seo ka go lebaka le lengwe le le lengwe, go kgabola lebaka le lengwe le le lengwe, ka mehla go bile le lesolo la phodišo. Gomme ge e le lesolo la phodišo la mmapale, ka morago ga lesolo leo, ka mehla, ke molaetša. Ga go tsoge gwa ba leswao la fiwa feela bakeng sa leswao; le bula madibogo a molaetša.

21 Gomme ke a dumela selo sa go swana ke, mengwaga ye lesomešupa ya go feta, goba lesomeseswai bjale, gore Morena o nthomile ntle go thoma go rapelela balwetši. E dirile tsošetšo ye kgolo magareng ga batho. Bahlanka ba bantši ba Modimo ba bagolo ba ile pele ka masolo a phodišo, gomme, eupša lesolo la

phodišo, ka go lonamong, ge o sa nno dula ka go mokgwa wa go swana wa kgale wo o bego o le ka mehla, go na le sengwe sa phošo, lesolo lela la phodišo le be le se la romelwa go tšwa go Modimo. Le swanetše go goga šedi pele, le a bona, go hwetša šedi, gomme morago go molaetša.

<sup>22</sup> Jesu, ge A tllile, a fodiša balwetši, le go ya pele, O be a le Moprofeta yo mogolo go bona bohle. Eupša ge A thoma go ba botša Therešo, ya Ebangedi, Yo A bego a le le se A bego a se tletše, ka gona O be a se—O be a sa tuma ka morago ga fao. Gomme ye ke tsela ye ka mehla ba bilego go kgabola lebaka le lengwe le le lengwe, gomme e tla tšwelapele ka tsela yeo.

<sup>23</sup> Bjale re mo morago ga sekgalela se, gomme ka gona gosasa morago ga sekgalela ka go otitoriamo ye ya go swana. Tšohle ke ka iri ya bošupa. A ke nnete, ngwanešu? [Ngwanešu o re, “Masometharo a šupa.”—Mor.] Masometharo a šupa, bosasa morago ga sekgalela, goba mantšiboa, gomme morago Labobedi mantšiboa. Gomme ke nagana Laboraro mantšiboa, gape. [“Aowa, ka Ramada Inn, Laboraro.”] Ka Ramada Inn, Laboraro. Gomme morago ka Labone, yeo ke nnete, go thoma kho—kho khonferense. Gomme ge Morena a rata, ke nyaka go ba mo go e kgabola yohle.

<sup>24</sup> Ke mo, ngwaneno, mothuši ka Mmušong wa Modimo, go le thuša go e ka ba eng ye nka kgonago. Go araba potšišo ya lena, nka no se kgone go e dira. Eupša, ka go rapela, go molaleng re tla kwešiša ge re ka e rapelela le go ya go Modimo ka yona, e sego go goga dikgopolo tša rena beng.

<sup>25</sup> Ge o babja, ke duma ge nka kgona go go fodiša, eupša ga go motho a ka kgonago go dira seo. E šetše e dirilwe. Phodišo e letše ka go wena. Ke tumelo ya gago ka go mešomo ye Modimo a e dirilego godimo ga Khalibari, ka Jesu Kriste. Gomme ka ntle ga seo, ga go phodišo; gomme ka ntle ga seo, ga go phološo; ga go kereke, ga go kereke ya leina, ga go tirelo, ga go selo se rwelego phološo. Jesu Kriste, “O gobadišwe ka baka la dikarogo tša rena, ka megogoma ya Gagwe re fodišitšwe. Yena o gobadišwe ka baka la karogo, dikarogo,” ntshwareleng, “ka megogoma ya Gagwe rena re *ile ra*,” tšohle ka lebaka le le fetilego, “re ile ra fodišwa.” Bjale, godimo ga yeo!

<sup>26</sup> Ga ke na le eupša dinakwana di se kae go bolela, morago ga sekgalela se, go lena, go molaleng ye masomepedi, metsotso ye masometharo, gomme morago re ya go kitimiša mothalo wa thapelo. Letšatši le lengwe le le lengwe, bjalo ka mehla, batho ba baswa ba tla ka gare, kafao go tla ba dikarata tša thapelo tše mpsha di fiwa ntle. Eupša re tla dira tšohle tšeo ka maatla a rena, tšohle Modimo a tla re dumelelago go di dira, go rapelela motho yo mongwe le yo mongwe wa go babja a tlogo, yoo a nyakago go rapelelwa.

27 Ge go na le selo se sebjalo ka motho a fofela ka gare, a ehwa, tšhoganetšo goba se sengwe, gobaneng, o ka no bona Ngwanešu Williams, Billy Paul, goba ba bangwe ba bona go ba iša ka kamoreng, gore ga ba nyake go . . . Ga ba kgone go dula, ba a hwa, ba swanetše go direlwa thwi bjale, gabotse, ba beeng ka kamoreng gore ke kgone go ya go bona gonabjale.

28 Eupša go kaonekaone kudu, ge o se ka go seemo seo sa tšhoganetšo, gore o—gore o tla no tšea dithutotumelo tša gago le—le ditumelo tša gago, gomme wa no di kgoromeletša thoko metsotso e se mekae, feela botelele go lekanela go theetša go se Lengwalo le se bolelago, le gona se Modimo a se dirago ka se A se tshepišitšego. Gomme seo se tla aga tumelo. Gomme ebile o ka se hloke go ba ka mothalong wa thapelo, goba ga go yo motee go go rapelela. O šetše o fodile, ge o ka no kgona go e dumela. Le a bona? Gomme wo ke morero wa gona, ke go go dira, ke go tliša ka go letswalo, go wena, ka seo Jesu a go diretšego.

29 Ga go bohlokwa go tla godimo mo le go khunama fase, le go rapela go kgabola, go fihla o—go fihla o phološwa. O šetše o phološitšwe, eupša o swanetše go e amogela. Go rapela ga gago ga go e dire. Tumelo ya gago ke yona o phološwago ka yona, e sego thapelo. Eupša, “O phološwe ka tumelo.” Selo sa go swana ka phodišo. Ke na le nnete bohle re kwešiša seo.

30 Gomme ge go na le basetsebje ka dikgorong tša rena, re nyaka o tsebe gore, ge e le nnamong, goba sehlopha se ke nago naso mo bjale, Banna ba Kgwebo ba Full Gospel, ga re emele kereke ya leina ya mokgatlo ye e itšego. Re emela feela badumedi ba Bakriste ka go dikereke tša maina tšohle. Yo mongwe le yo mongwe o amogetšwe. Re nno thaba go ba le wena. O re, “Gabotse, ke nna wa kereke ye e itšego, a nka rapelelwa?” Ebile ga wa swanela go ba wa kereke, ga wa swanela go dira selo eupša go tla godimo mo le go dumela Modimo. Ke sohle o swanetšego go se dira. Modimo o dira ka moka ga yona.

31 Bjale, nna ke—nna ke . . . tšofaditše Beibele e tee, ge e sa le ke thoma ka go masolo a phodišo, goba go rapelela balwetši, a ke re. Ka Houston, Texas, ke filwe Beibele, mengwaga ya go feta, mengwaga tsoko ye lesomeseswai ya go feta, ke Ngwanešu Kidson le sehlopha sa gagwe. Gomme ke tšofaditše Beibele yeo, morago le pele, go dikologa lefase, go fihla e tšofetše go felela, matlakala a tšwa go yona.

32 Ke sa tšwa go fiwa Beibele ye mpsha. Gomme selo sa go makatša . . . Ga ke ne tumelokhwele; ke a holofela lena batho ga le nagane ke na le tumelokhwele. Ge Beibele ye e filwe go nna, ba bile le tše nnyane . . . dimaraki tše nnyane tše pedi ka go yona, diripone tše nnyane. Ke Beibele go swana le ye ke nago nayo.

33 Ngwanešu Kidson o mphile e tee e be e le Beibele ya Scofield, bjale, e sego ka gobane ke dumelelana le Mna. Scofield ka go dinoutse tša gagwe. Bjale, go molaleng ba bangwe ba lena ba

a dira, ba bangwe ba lena ga ba dire, eupša ke no le dira le tsebe gore ga ke tšee Beibele ya Scofield ka gobane ke dumela seo. Ka gobane, o e dirile ditemana go tloga ke . . . Yeo e bile ye nngwe ya Dibeibele tša ka tša pele, gomme ke nno ithuta go e bala ka mokgwa woo. Gomme ke no boloka Beibele ya go swana. E le gore, ge nkabe ke bile le Thompson Chain, e ka be e bile kaonekaone kudu. Nkabe ke hweditše temana ya ka ka lebelo kudu ka go Tšhupetšo ya Thompson Chain.

<sup>34</sup> Eupša ge ke butše Beibele, ripone ye nnyane ya pele ka Beibeleng e be e makatša kudu, mo e bego e le. E be e le ge Salomo a gafela tempele ya Modimo, gomme Letago la Modimo e be e le le legolo kudu, letago la Shekinah ka moagong, go fihla baprista ebile ba sa kgone go direla.

<sup>35</sup> Gomme lenti la go latela le be le robetše moo Esera a boilego le go gafela tempele.

<sup>36</sup> Gomme semaraki sa boraro se sennyane, se mosadi wa ka a nkhweditšego le go se bea ka Beibeleng, ke sa tsebe, ka leina la ka godimo ga sona, le go ya pele, se be se robetše ka go Mareka 11:22. O nno se hlomela ka Beibeleng, gomme fao ke mo se bego se le, gore, “Ge o re go thaba ye, ‘šuthišwa.’” Gomme lena bohle le a tseba ge Lengwalo lela le be le le ka monaganong wa ka, lena batho ba theipi, mo ke ge dihlorana tšela di etla thwi ka gare, ka go se—se . . . Seo ke tlwa.

<sup>37</sup> Gomme selo sa go makatša sa yona e be e le, nonyana mamaratwe wa ka, robini, seswantšho se be se le godimo ga semaraki, nonyana ye nnyane ka sefega se sehubedu. Gomme ge kanego ya kgale e eya, gore nako ye nngwe o be a le nonyana tsothwa; eupša go be go le Monna a ehwa, letšatši le lengwe, godimo ga sefapano, gomme o ile a kwela Monna bohloko kudu go fihla a fofela gare go leka go goga dipekere go tšwa yenamong, gomme a ba le Madi gohle godimo ga sefega se sennyane sa gagwe, gomme ge e sa le go tloga nako yeo o bile sefega se sehubedu. Yeo ke tsela ye ke—ke nyakago go kopana le Mophološi wa ka, le nna, ka Madi a Gagwe godimo ga sa ka . . . ka gare ga sefega sa ka, godimo ga pelo ya ka.

<sup>38</sup> Gomme ka gona kopano ya ka ya pele, Molaetša wo ke tla o rerago ka mo, ke ka Phoenix, Arizona. *Phoenix* ke se sengwe se ka kgonago go tsogela godimo go tšwa go lefeela. Seo ke se Modimo a se dirago. O tšea lefeela, a tsošetša se sengwe godimo go tšwa go sona.

<sup>39</sup> Gomme Molaetša wa ka morago ga sekgalela se, o bitšwa, metsotso ya go latela ye masometharo goba masomenne, “kgakgamatšo.” Gomme ke nyaka go bala go Lengwalo leo . . .

<sup>40</sup> Mengwaga e se mekae ya go feta, gore, ke be ke tšea Beibele, gomme ke go dumelele o nnele Beibele, ge la pele ke be ke thoma bodiredi bja ka; gomme go no tšea Beibele ya gago, gomme ba bantši ba lena ba mpone ke e dira, go no e swara e bulegile

ka mokgwa *wola*, le go re, “Morena, Molaetša go nna o kae?” E bulegile go Joshua, tema ya 1, Beibele e ka ba efe o bego o ka nneela.

41 Go fihla bošego bjo bongwe pono e tlile, ye le e tsebago, gomme ke bone Beibele yela e etla fase go tšwa Legodimong, gomme seatla ka lepanta godimo ga diaka, ka mokgwa *wo* le eya go theoga ditemana tše senyane tša pele tša Joshua.

42 Moo ke mo ke balago go tšwa gona, morago ga sekgalela se, bakeng sa palo ya ka, goba palo ya ka ya Lengwalo. Sehlogo sa ka se hwetšwa ka go temana ya 10 gomme le—le. . . Ke ra tema ya 10 gomme temana ya 12.

43 Pele re bula Beibele, a re inamišeng dihlogo tša rena nakwana feela. Bjale ka dihlogo tša rena le dipelo tša rena di inamile, a re naganeng se. A ye e se ke ya no ba kopano ya go tlwaelega; re bile le tšeo nako yohle. Eupša a re rapeleng Modimo, yo mongwe le yo mongwe wa rena, bakeng sa ye go ba ya go feta go tlwaelega, go fihla bontši bjo e lego gore Bogona bja Modimo bo tla ba le rena go tšwelapele go kgabola kopano.

44 Tate wa Magodimong, re leboga kudu ka monyetla wo mobotse wo le wa go hlomphega go ba mo ka Phoenix morago ga sekgalela se, go kgobokana ka go otitoriamo ye kgolo ye mo, magareng ga batho ba. Gomme bjale re no ba kgauswi le go batamela Lentšu. “Gomme Lentšu le ile la dirwa nama gomme la dula magareng ga rena.” Gomme a nke go be gape, Morena, gore Lentšu le tla ba nama, Le tla tšhologa ka kereke ya Gago le batho ba Gago, go phethagatša ditshepišo tša iri.

45 Bjale ka ge re lemoga gore re—re tswalela nako, nako e kitimela ntle. E felelela ka gare ga Bokagosafelego. Gomme re ka Lebopong la Bodikela. Gomme bjalo ka ge tlhabologo e sepetše, Bohlabela go ya Bodikela, Ebangedi e sepetše bjalo le yona. Gomme bjale ga go lefelo go ya eupša morago Bohlabela gape. E fedile.

46 Gomme re a rapela, Tate wa Magodimong, gore ye e tla ba iri ye kgolo go rena bohle, gore re ka kwa Bogona bja Moya wo Mokgethwa, Mongwadi wa Lentšu le, morago ka moagong wa tabarenekele ya nama; a iponagatša Yenamong go rena, ka go tebalelo ya dibe tša rena, go lebalela bokgopo bja rena, gomme le netefatše gore A ka se balele modumedi sebe, ka netefatšo ya seo. Gomme gape gore O tla fodiša mefokolo ya rena, le go tšea ba—ba batho go tloga ditulong tša bogolofadi le go tloga go mahlotlo; le go ba fa go bona, bao ba fofetšego; le—le koketšo ya matšatši, a bao ba hwago ka malwetši a go šiiša boka kankere le bolwetši bja mafahla, bo tšwetšego pele, le malwetši ao dingaka tša rena di sa kgonego go a thibela. Bo ka godimo ga seo, eupša, Modimo, O ya ka godimo ga phatišišo yohle ya bosaense. O ya ka godimo ga go fa mabaka gohle. Efa go bahlanka ba Gago, morago ga

sekgalela se, go bolela le go kwa Lentšu la Gago, ka thuto ya: *Kgagamatšo*. Ka gore re e kgopela Leineng la Jesu. Amene.

<sup>47</sup> Bjale ka Beibeleng, Joshua tema ya 1, le Joshua tema ya 10. Tema ya 1 le temana ya 1.

*Bjale ka morago ga lehu la Moshe mohlanka wa MORENA go tlile gwa phethega, gore MORENA o boletše le Joshua morwa wa Nuni, modiredi wa Moshe, a re,*

*Moshe mohlanka wa ka o hwile; bjale kagona tsoga, gomme o tshela Jorodane ye, wena, le batho bohle ba, le ye ka go lefase le Ke ba fago, ebile le go bana ba Israele.*

*Lefelo le lengwe le le lengwe le kgato ya leoto la gago e tla gatago godimo ga lona, leo Ke go file lona, bjalo ka ge Ke boditše Moshe.*

*Go tloga lešokeng le Libanone ye ebile go fihla ka noka ye kgolo, noka ya Forata, naga yohle ya Bahete, le go . . . bodikela tsatši, e tla ba le bopo la gago.*

*Moo go ka se be monna e ka ba a ka kgonago go ema pele gago matsatši ohle a bophelo bja gago: bjalo ka ge Ke bile le Moshe, Ke tla ba le wena bjalo: Nka se go palliše, le ge e le go go tlogela.*

*Tia maatla le mafolofolo a mabotse: ka gore ke wena o tla abelago batho ba bohwa bja naga, ye Ke enetšego botatagobona go ba fa yona.*

*Feela tia maatla le mafolofolo kudu, gore o hlokomele go dira go ya ka molao ohle, woo wa ka . . . wo Moshe mohlanka wa ka a go laetšago: o se fapoge go wona go ya go seatla se setona goba sa ntsogohlo gore o atlega mogohle o yago.*

*Puku ye ya molao e se ke ya tloga go tšwa molomong wa gago; eupša o tla akanya ka gare ga yona mosegare le bošego, gore o hlokomele go dira go ya ka tšohle tšeo di ngwadilwego ka fao go yona: ka gore ka gona o tla dira ditsela tša gago go atlega, gomme ka gona o tla ba le katlego ye botse.*

*A Nna ga se ka go laela? Tia maatla gomme o be le mafolofolo a mabotse; se boife, ebile o se gakanege: ka gore MORENA Modimo wa gago o na le wena kae kapa kae o yago.*

<sup>48</sup> [Ngwanešu Branham bjale o bala Joshua 10:12-14—Mor.]

*Ka gona Joshua a bolela go MORENA ka letšatši la ge MORENA a gafetše godimo Baamoro pele ga bana ba Israele, gomme o rile mahlong a Baisraele, Ema o šišimale godimo . . . Letšatši, ema . . . šišimale godimo ga Gibeone; gomme wena, Ngwedi, ka moeding wa Ajaloni.*



*Gomme letsatši la ema go šišimala, gomme ngwedi wa dula, go fihla batho ba itefeditše bonabeng godimo ga manaba a bona. A se ga sa ngwalwa ka go puku ya Jasher? Kafao letsatši le eme go šišimala gare ga legodimo, gomme la se hlaganele go dikela e ka ba letsatši ka moka.*

*Gomme ga se gwa ke gwa ba letsatši la go swana le leo pele ga lona goba morago ga lona, mo Morena a kilego a kua lentšu la motho: ka gobane MORENA o be a lwela Israele.*

<sup>49</sup> A nke Morena a oketše ditšhegofatšo tša Gagwe go palo ya Mantšu a Gagwe. Bjale thuto morago ga sekgalela se: *Kgakgamatšo.*

<sup>50</sup> Bjale, lentšu *kgakgamatšo*, bjalo ka ge ke be ke sa nno le lebelela godimo le go ba le nnete gore—gore le be le nepile, lentšu *kgakgamatšo* le ra, go ya ka Webster, gore se “sengwe se sa kgolwegego, eupša ke therešo.” Bjale, le a tseba, re kwele polelo ya kgale, gore—gore “Therešo e kudu” (ba se bitša eng seo?) “go se tlwaelege kudu go feta maaka,” ke therešo. Ka gobane, ge motho a bolela therešo, dinako tše dingwe ga gwa tlwaelega kudu.

<sup>51</sup> Ke tseba mogwera wa ka, yoo, godimo ka Colorado. Ba bile le nyakišišo, ba be ba eya go ba le nyakišišo ka tshepe ya dinakamaphakga. Gomme go na le masomepedi tee a hlogo tša ditshepe tša dinakamaphakga ka mohlapeng. Gomme mogwera wa ka, ge, o be a le morago kua a tsoma, gomme ge bahlapetši ba etla godimo. Gomme ba lefile poreisi ye kgolo, boloti bo dirile, bakeng sa setee sa disepelalehlweng tše, go ya morago le go nyakišiša ditshepe tša dinakamaphakga. O rile, “Le be le se la swanela go šomiša tšhelete yohle yeo. Nka kgona go le botša ke ditshepe tša dinakamaphakga tše kae morago kua.” Gomme ba ile ba no mo sega. Ba rile, “Ke tše kae?”

<sup>52</sup> O rile, “Go na le lesomesenyane.” O rile, “Go be go na le masomepeditee, gomme ke bolaile tše pedi tša tšona.”

<sup>53</sup> Gomme mohlapetši o mo segile. O dumeletšwe feela go bolaya e tee, le a tseba. Gomme o rile, o rile, “Ya, ke a tseba o dirile.”

<sup>54</sup> “Gabotse,” o rile, “seo ke se ke se dirilego. Go be go na le ditshepe tša dinakamaphakga tše masomepeditee, gomme ke bolaile tše pedi.”

<sup>55</sup> Gomme mohlapetši o nno sega le go boela morago. Gomme seo ke se se bego se le fao, ditshepe tša dinakamaphakga tše lesomesenyane. Le a bona?

<sup>56</sup> O retologetše go nna, a re, “O a bona, modiredi, e no bolela therešo, batho ga ba e dumele.” Le a bona, go no bolela therešo, kafao ka nnete ke mosetsebje go feta maaka.

57 Joshua mo ke Puku, gabotse, ke Puku ya topollo, ya Testamente ya Kgale. Joshua, re swanetše go e tšea go ba yeo, Puku ya topollo. Ka gobane, ke, topollo e ne dikarolo tše pedi. Topollo, e ka ba kae, e na le dikarolo tše pedi. Tšeo ke, ke “ka ntle ga,” le “go ya ka gare.” Go tšea dikarolo tše pedi go dira topollo, “ka ntle ga,” “go ya ka gare.”

58 Moshe o be a emetše molao wo o ba ntšheditšego ka ntle ga Egepeta, gomme, mola e le gore, Joshua o be a emetše mogau wo o ba tšeetšego ka nageng ya tshepišo. Tsela ye nngwe, e bile, mo—mo molao le mogau e be e le mafapa a mabedi a go fapana a taelo ya Modimo. Bjale, molao o ba ntšheditše ntle, Moshe, gomme Joshua o ba tšeetše ka gare.

59 Gape o emela se sengwe go letšatši la rena. Bjale o emela, bjalo ka ge ba be ba le ka leetong, ba etšwa—etšwa Egepeta go ya ka nageng ya tshepišo, kafao re tšwa ka lefaseng la Egepeta, tlhakahlakano, tseleng ya rena go ya Nageng ya tshepišo. “Ka ngwakong wa Tate wa Ka go dintlokgoparara tše ntši; ge go ka be go se bjalo, Nkabe ke le boditše,” Johane 14. Go tšwela ka “ntle ga,” “go ya ka gare.”

60 Ke molao wo o re tlišago go lemoga re phošo, eupša ke mogau wo o re lebalelago. Molao ga o ne kholofelo ya—ya topollo, ka gore . . . le go e feleletša. Ga o ne mogau ka go wona, molao o šupa feela gore o modiradibe, eupša mogau o go botša mokgwa wa go tšwa ka go sona. Molao ke lephodisa le le go beago ka kgolegong, eupša topollo ke yo Motee Yo a tlilego a lefilego kotlo ya gago; le go tšwela ka “ntle ga,” le “go ya ka gare,” ka gare ga mogau.

61 Baefeso. Bjale re hwetša selo sa go swana, Testamente ya Kgale, ke a nagana Puku ye ya Joshua e a swanela. Lentšu la go swanela la yona, e tla ba, Puku ya Baefeso ya Testamente ya Kgale. Puku ya Baefeso ya Testamente ya Kgale, e be e tla ba selo se sebotse go bitša Puku ye ya Joshua, ka gobane ka kgonthe e swanela ka go ye.

62 Bjale re hwetša Joshua a emela mogau, goba seloba, se se ka se bego ka nako e tee mo molao o bego o phela.

63 Ebile le molaetša e ka ba ofe, wo o tlišago batho pele, o ka tsogego wa dira mawelakgahlano le molaetša wa go feta. O ka se e dire. Ke fao le nago bothata lehono. Jesu o rile, “A motho e ka ba mang a ka tšea se—se setšhesa se seswa gomme a se bea ka go sa kgale? Goba a bea beine ye mpsha ka mapotlelong a kgale? A a senyega. E a phatlola.” A ka se e kgotlele.

64 Gomme Joshua a ka se kgone le gatee go tla ka go bodiredi bja gagwe go fihla morago ga ge Moshe a ile. Kafao le bona yona temana ya pele mo, “Moshe mohlanka wa Ka o hwile; bjale tsoga gomme o tšee batho ba go ya naganeng ya tshepišo.” Moshe, a emela molao, o diretše nako ya wona. O, molao o diretše nako ya wona.

65 Ba thomile go ya ntle, ka kgonthe, ka mogau, sa mathomo. Pele ba eba le molao, ba bile le mogau. Ge ba be ba le ka Egepeta, ntle le molao; go se yo motee tlase kua, e be e no ba baprista, le go ya pele, eupša ba be ba se ne molao le ge e ka ba ofe. Molao o be o se wa be wa fiwa. Mogau o ba file moprofeta. Gomme, gape, mogau o file seloba, kwana ya sehlabelo. Re ya ka go seo beke ye, go sehlabelo, madi, ka gobane fao go robetše phodišo ya gago. Kafao godimo. . . Seloba se filwe pele fao go eba molao e ka ba ofe. Mogau o bile pele ga molao, nakong ya molao, le ka morago ga molao.

66 Kafao go bile Joshua, a emela mogau, o bile thwi mmogo le molao, eupša o sa kgone go matlafatšwa ge feela molao o be o sa le lefelong la wona la maleba.

67 Gomme kereke ya lefase ka go letšatši le la mafelelo e bile bjalo! E tlile mmogo, e bapadile karolo ya yona, eupša go tla nako moo e swanetšego go goma. E swanetše go e dira. Go swanetše go ba Baefeso, gape, ba leeto le, feela bjalo ka ge go bile ba maeto a mangwe. Fao go swanetše go tla Baefeso, Efeso, Moefeso wa leeto le. Šetšang.

68 Ka moo molao woo ga se o tsoge wa kgona go phološa modiradibe, bjalo ka ge ke laeditše ntle. Ga se o kgone. Ka gona naga ya tshepišo e be e emela letšatši la mogau. Le a bona, ga se o kgone go ba tsenya ka gare, ka leetong leo.

69 Gomme ge le etše hloko, ka leetong leo, ba bile le magato a mararo a leeto la bona. La pele e be e le boitokišetšo ka tumelo, tlase ka Egepeta, ka tlase ga kwana ya sehlabelo. Morago ba tšetše Lewatle le Lehubedu, go ya ka le—le lešokeng, karogano, yeo e emelago legato le lengwe la leeto.

70 Nnete, ka tlase ga boitokišetšo, ge bohle ba bile komana, morago ge ba etla go—go Lewatle le Lehubedu, go bile go palelwa gape. Batho ga se ba dumela, morago ga go bona dilo tše ntši tšeo Modimo a di dirilego. Ba ile ba no se dumele. Gomme Modimo o butše godimo Lewatle le Lehubedu le go ba tšeela pele, mo re botšwago gore batho bohle ba kolobeditšwe go Moshe, ka tlase ga Leru le lewatle.

71 Bjale ba ile ba kolobetšwa, ba sokologile le go kolobetšwa, le go tla ntle go sepela ka bophelong bjo boswa, ka nageng ye mpsha, ka bosweng bja leeto, magareng ga batho ba baswa, le seatla sa Modimo godimo ga bona. Eupša mafelelong e tlile lefelong, ka mosepelong wo ba bego ba na le wona, gore ba be ba se ba kgotsofala ka mosepelo wa bona wa mogau. Ba ile ba swanela ke go tla go se sengwe se ba bego ba ka kgona go se dira bonabeng.

72 Bjale ke mo batho ba naganago, lehono, ka phodišo Kgethwa, goba e ka ba wo mongwe wa mošomo wa mogau, wa Modimo, gore go ne se sengwe se o swanetšego go se dira. Wena, ga go selo o swanetšego go se dira eupša go dumela, go no dumela Modimo.

73 Gomme, bona, ge ba ka be ba ile ba tšwelapele! Tshepišo e be e se ya fiwa bona ka tlase ga molao. Tshepišo e be e filwe pele ga molao, ntle le lebaka e ka ba lefe go yona, “Ke le file naga ye, eyang mošola ka go yona!” Eupša pele ba fihla go tshepišo yeo, ba tšere sephetho go be go na le se sengwe ba swanetšego go se dira bonabeng.

74 Gomme, seo, re sa hwetša seo magareng ga batho. Re no hlamega go ba ka tsela yeo, “Go na le se sengwe re swanetšego go se dira.” Re ikwela gore, gore re swanetše go ba le se sengwe ka go sona le rena.

75 O na le se sengwe ka go sona, ke go neela ga gago ga thato ya gago mong, mebono ya gago mong, go thato le mmono wa Ramaatlakamoka Modimo, gomme go fedile. Ke tšohle di lego fao. E no tšea tshepišo ya Gagwe, se nagane ka selo gape. Sepela ka Yona, gomme Modimo o dira ka moka ga yona.

76 Ka gona ba nyakile molao. Gomme Modimo ka mehla o go fa tlhogelo ya pelo ya gago; O tshepišitše go dira. Eupša re hwetša ntle, ge ba retologile kgato e tee go tloga lehlakoreng la se Modimo setlogong a ba tshepišitšego sona, go tloga moo e bile mootlwa ka nameng go fihla molao o tlošwa, go fihla Jesu Kriste a tlile gomme a bapolwa go tloša molao. E be e le mootlwa ka nameng.

77 Gomme e ka ba eng ye o lekago go e dira ka gare gagagomong, ka mehla e tla šomela go go se hlomphege ga gago. E tla šomela go go se holege ga gago. Ga bonolo e no dumela Modimo, gomme seo a rarolla. Se Modimo a se tshepišitšego, “Ke nna Morena Modimo wa Gago Yo a fodišago malwetši a gago ohle.” Le a bona? “Ge go le e ka ba bomang magareng ga lena, ba babja, a ba bitše bagolo ba kereke.” O tshepišitše. “Mediro ye A e dirilego, e be e tla dirwa ka kerekeng ya Gagwe.”

78 Gobaneng re swanetše go amogela mekgatlo, le go ya pele, e tla ngwalago seo go tloga Pukung? Le a bona, e—e ba mootlwa ka nameng. Gomme fa mafelelong a nako, re kopana le selo gape, sefahlego ka sefahlego, go tšwa go Mamethodist, Mabaptist, Mapresbyterian, le e ka ba eng gape, le a bona. Lena, le ka se kgone go ya pele; le swanetše go tla morago go Ebangedi yohle ya go tlala. E be e diretšwe motho wa go tlala, ke Modimo wa go felela Yo a dirilwego nama le go dula magareng ga rena. Gomme re a tseba gore dilo tšeo ke therešo.

79 Bjale ge re ela hloko, ka gona, leeto la bona ka lešokeng ke mo ba bilego le phošo ya bona ye kgolokgolo Israele e kilego ya e dira, go fihla Khalibari, e bile ge (ka go Ekisodo 19) ba amogetše molao sebakeng sa mogau. Ba bile le mogau. Ba bile le moprofeta. Ba bile—ba bile le kwana ya sehlabele. Ba bile le topollo. Ba tlišitšwe go kgabola Lewatle le Lehubedu. Ba fodišitšwe malwetši a bona. Ba bile le meetse go tšwa leswikeng le le iteilwego. Ba bile—ba bile le mana go tšwa legodimong. Se

sengwe le se sengwe ba bego ba se hloka se filwe, gomme go le bjalo ba be ba sa nyake se sengwe gape.

<sup>80</sup> Bjale seo ke sekai sa go phethagala sa Baefeso ba rena lehono, tlwa. Re tlile ntle ka fase ga Luther; re ile go kgabola tlhwekišo, ka fase ga Methodist; le go tla ka go pušetšo, ka fase ga Pentecost. Feela tlwa go swana le ge e be e le, leeto la lešokeng. Gomme ge Modimo a re tlišitše ntle, re dirile gabotse. Eupša re dirile eng? Re nyakile go swana le ka moka ga bona. Bjale re hwetša ntle gore mogau ke selo se nnoši se se re tšeago go kgabola, ga se ya tsoge ya ba molao.

<sup>81</sup> Joshua mo ke sekai sa bodiredi bja letšatši la mafelelo. Le a bona? Bjale elelwang dikgato tše tharo tšela tša leeto. Tšohle tša lona di ile tša goma, sa pele molao le se sengwe le se sengwe di ile tša swanela go goma, gore Joshua . . . Gomme *Joshua* ke lentšu la go swana bjalo ka Jesu, “Jehofa-mopholoji,” yo a ba tšerego go tloga lešokeng la bona go ya ka nageng ya tshepišo. Bjale ke a tseba ba bantši ba swere . . .

<sup>82</sup> Gomme ga ke nyake go se dumelelane le dirutegi, eupša bontši ba swere gore naga ya tshepišo e emela Legodimo. E ka se kgone go emela Legodimo. E ka se kgone, ka gobane ba bile le dintwa, le mathata, le dikgakanegokgolo, le se sengwe le se sengwe, ka nageng ya tshepišo. Ga e emele Naga ya tshepišo.

<sup>83</sup> Eupša le ela hloko, feela pele ba tsena naga ya tshepišo, tšohle di—di diphapano tše—tše di bego di tsogetše godimo magareng ga bona. Ba . . . Yo motee wa dilo tše kgolo e be e le Kora. O be a sa nyake boetapele bjo bja monna yo motee. Dathane, le ka fao ba tlilego pele ga Moshe le go leka go mmošša gore “mo—mo molaetša o be o swanetše go ra se,” le go bea tlhathollo ya go fapana go wona, mebono ya bona ya se o bego o le sona. Gomme bona yo mongwe le yo mongwe o senyegile! Yo mongwe le yo mongwe!

Jesu o rile, “Go be go se yo motee wa bona eupša yo a senyegilego.”

<sup>84</sup> Ba rile, “Botatawešu ba ja mana ka lešokeng, sekgoba sa mengwaga ye masomenne,” Mokgethwa Johane 6.

Jesu o rile, “Gomme bona yo mongwe le yo mongwe o hwile.”

<sup>85</sup> *Go hwa* go ra “go arogana ka Gosafelego.” Bona bohle ba hwile, efela ba ipshinne ka go kwa molaetša, efela ba ipshinne ka mana a a welego. E sego mana a mangwe, mana a mmapale!

<sup>86</sup> Eupša ge go etla go nako ge Biliama a etla ntle le thuto ya maaka, le go re, “Rena bohle re batee. Gobaneng re sa no ya mmogo le go dumelela bana ba rena go nyalana seng? Re setšhaba se segolo. Re tla le dira ba bagolo le rena.” Bjale e ka ba mang ka kweišo ya go tlwaelega ya semoya o kgona go bona tlwa selo seo sa go swana le lehono, go nyalana bohle ba bona mmogo. Gomme e bile sebe sa go se lebalelwe. Ga se sa tsoge sa lebalelwa Israele.

Eupša nako yeo Joshua o tsogetše godimo bakeng sa khudugo.

<sup>87</sup> Bjale re a rutwa, ka go Kutollo tema ya 6, ke a dumela, ya, tema ya 6, ka Mahuto a Šupa. Ao a swanetšego. . . Puku go tswalelwa ka diphiri tše šupa, goba Mahuto a Šupa, Kutollo 6. Gomme ka go letšatši la mafelelo, Kutollo 10, ka go Kutollo 10, re hwetša ntle gore Laodikia, motseta wa mafelelo wa lebaka la mafelelo, gomme lebakeng la nako ya seprofeto sa gagwe, gore Mahuto a Šupa a tla bulwa, diphiri tše šupa, diphiri dimenwagašupa tše di bego di tlogetšwe.

<sup>88</sup> Ka go lebaka le lengwe le le lengwe go bile tše dingwe tša Lona di tlogetšwe. Mompshafatši ga se a ba le nako go Le hlokomela. Ka go matšatši a Luther, o nno rera tokafatšo ka tumelo. O ile a ya, ba dira kereke. Morago ga fao gwa tla Wesley, o rerile tlhwekišo. E be e le fao. Gomme mmogo gwa tla Mapentecostal.

<sup>89</sup> Eupša re a tshepišwa, go ya ka Kutollo 10, le go ya ka Maleaki 4, le Mokgethwa Luka 22:17, le go ya pele, gore go swanetše go tla ba—ba Baefeso go le. Fao e tshepišitšwe, bagwera. Go swanetše go tla Baefeso, gore diphiri dimenwagašupa tše tša Lentšu la Modimo di swanetše go tatollwa. Gomme ke ka go lebaka la Laodikia mo se se diregago. Ke a dumela gore re—re fao.

<sup>90</sup> Ke a dumela re ka go meriti ya go Tla ga Morwa wa Modimo. Gomme bjalo ka Joshua, feela pele Baefeso e phagamela godimo, kafao Johane Mokolobetši o phagametše godimo feela pele ga Baefeso ba go latela. Gomme re tshepišwa ye nngwe, Baefeso ye nngwe. E akanyeditšwepele ka Lengwalo mo, kafao ke a nagana re phela ka go Baefeso gape. Morago gape go. . . Re a tshepišwa gore yeo e be e tlogetšwe lebakeng la mabaka ao a šupa.

<sup>91</sup> Bjale o ka se kgone go oketša selo go Puku, goba go tloša selo go tloga go Yona. Kutollo 22:18 e bolela bjalo, “Yo a ka tsogego, a ka oketšago lentšu le tee, goba a tšea Lentšu le tee, karolo ya gagwe e tla tšewa go tšwa Pukung ya Bophelo.” Bjale re ka se kgone go oketša goba go tšea.

<sup>92</sup> Kafao kagona re a tseba gore Luther ga a kgona go fihla go Lona; Wesley, le go ya pele, bampshafatši, Knox, Finney, Calvin, pele go theoga, go ya pele, ga se ba Le hwetša lohle, eupša se ba bilego naso ke Therešo ya Ebangedi.

<sup>93</sup> Eupša bjale ka matšatšing a mafelelo, re fiwa kwešišo, ke Lentšu, gore re ya go Le kwešiša, ka gore go tla lebaka la Efeso go lona. Gomme re mo! Bjale, kgakgamatšo! Ke tla tlogela seo se lekeletše, gobane ke no ba le e ka ba metsotso ye lesome gape gomme ka gona re tla ba le mothalo wa thapelo. Kgakgamatšo!

<sup>94</sup> Go na le batho tsoko, ba lehono, ba ba sa dumelego go mehlolo. Ba re ba no se “kgone go dumela gore go na le selo se sebjalo ka mehlolo ka go lebaka le la sebjalebjae.” Gabotse, ga ke re go bolela e ka ba eng ye mpe ka motho yoo, eupša ba

hwile bogatšu semoyeng. Bona, bona, bona ba—bona ba foufetše semoyeng. Bona ga ba ne pono ya semoya goba maikutlo a semoya, le gatee. Ka gobane, ga go monna a ka kgonago go dula ka go lešaba la batho, ka fao Moya wo Mokgethwa o welago, ga go kgathale ge a le modiradibe go felela, goba mosadi, eupša yo a tlemegago go kwa Bogona bja Modimo, ge a bona Lentšu le A le tshepišitšego le phethagatšwa. Gona o swanetše go be o swere ke bogatšu; gomme ge o le bona ka mahlo a gago mong, le direga, gona o swanetše go ba sefoku, semoyeng, ga ke bolele nameng. Eupša ka nnete o ka kgona go fofala semoyeng, wa ba le masomepedi a bomasomepedi, pono ya nama.

<sup>95</sup> Le elelwa Eliya tlase ka—ka Dothane, ge a ile ntle le go itia mašole ka moka go fofala? Beibele e rile o dirile. Gomme a ba hlahlela go hlaselwa, ge ba be ba sa tsebe gore o be a le mang. Gomme efela o be a no ba tlwa se a bego a swanetše go lebege go swana, le go ya pele, gomme o ile thwi ntle go bona. Eupša ba be ba fofetše.

<sup>96</sup> Gomme o kgona go ema ka Bogoneng bja Modimo wa go phela, o ka kgona go ema ka tlase ga tlotšo ya Moya le go O bona o sepela, gomme go le bjalo O ka se go kgwathe. O ka kgona go bona se Modimo a se boletšego, se rerelwa wena ka go phethagala gomme ka gona sa bonagatšwa, gomme go le bjalo wa se ye ka gare, “wa se O dumele,” gona, fao, o wa go se fihlelelege. O šetše o hwile, o hwile bogatšu, o fofetše, o ile. Ba be ba le ka go felelela.

<sup>97</sup> Lefase. Ke a makala, ge motho wa go swana yo a sa dumelego go mohlolo, ke a makala gomme ge ba ka no kgona go ba dilo tše di ka kgonago, tše e lego tša kgonthe, ke tšeo di netefaditšwego sesaense? Ke a makala ge o ka kgona go ba le rasaense e ka ba mang, goba e ka ba mang yo a sa dumelego go mohlolo, go ntlhalošetša ka fao lefase le emago godimo ga obiti ya lona. Le swara bjang nako ya lona ya go phethagala, go dikologa ekhweita le tsela ye e yago, gomme feela go phethagala? Ga re na le motšhene, sešupanako, goba mohuta e ka ba ofe, se ka kgonago go swara nako ka mokgwa woo; e tla fapana metsotso e se mekae kgwedi ye nngwe le ye nngwe. Eupša letšatši lela le nakong tlwa. Dikete tša mengwaga di tokologela pele, ga a tsoge a šutha; kgonthe, go phethagala.

<sup>98</sup> Kafao ngwedi o ka kgonago, dibilione tša dimaele go tloga lefaseng, o sa kgona go laola maphoto. Mpotšeng ka fao tshepedišo ye ya tša lefaufau ye re phelago ka go yona, ngwedi o ka kgona bjang go ba le khuetšo godimo ga meetse a lefase? Ka sesaense, mpotšeng kafao e dirwago. E ka se kgone go dirwa, ka gobane ga go tsela ya sesaense ya go e bolela. Eupša Modimo o beile ngwedi go hlapetša lewatle. Gomme ge ngwedi o thoma go retolla legetla la wona, ge lefase le retologa go tloga, mo go tla lephoto ka gare. Eupša ge o tsogela godimo, mosong wa go latela, o lebelela morago ka tsela ye, lephoto le boela morago go lefelo la lona gape. Ke mohlapešiši.

“Oo,” o re, “seo e no ba lebopong la lewatle.” Aowa.

<sup>99</sup> Seo se gabotse godimo mo ka Arizona, thwi morago godimo ka nageng ya Kentucky, kae kapa kae o epago molete fase ka mobung bokgole go lekanela go hwetša meetse a letswai. O tla hwetša ntle, ge lephoto lela le eya ntle, meetse a le a letswai a ya fase ka phaepheng. Gomme ge lephoto le etla ka gare, le lona le a rotoga, dimaele tše makgolo go tšwa lebopong la lewatle.

<sup>100</sup> Re ka rera thero ka leo. Kafao Modimo, ga go kgathale, O ka Letagong eupša ditaelo tša Gagwe kua di no ba khuetšo ya go swana godimo ga lefase ka moka le mang kapa mang yo a tšeago tshepišo yeo. Taelo ya Gagwe e filwe. O na le melao ya tlhago, gomme—gomme e—e tla iphetha yonabeng ka therešo go felela, go tloga Pentecost goba nako e ka ba efe ye nngwe. Nako e ka ba efe ye Modimo a dirilego tshepišo, O tla no fela a dutše le tshepišo go sa kgathale mo motho a lego, ke dikete tše kae tša mengwaga go feta. Melao ya Gagwe ka mehla e dula e swana.

<sup>101</sup> Ka fao peu e welago mobung, gomme e a bola, le go tšweletša bophelo gape. Go lebega o ka re, ge e ba e be e eya go tšweletša bophelo, e tla ba ge e le ka go sebopego sa yona sa go phethagala. Ge bophelo ka mehla bo le ka go yona, gona bo be bo reng bo sa no tšwelela? E bee ka mobung, bophelo bo tabogela pele. Gobaneng tšohle tše di lego go dikologa bophelo bjola, tšohle tše di lego go dikologa tlhako yela ye go sego motho a kgonago go e hwetša, go tla bjang gore se sengwe le se sengwe ka go go dikologa tlhako yela se swanetše go hwa? Gore e kgone go tabogela pele ka go bophelo bjo boswa. Eupša se sengwe le se sengwe go e dikologa le sona se swanetše go hwa le go bola, pele e ka tabošetša bophelo pele.

<sup>102</sup> Go bjalo le ka motho ka motho. Ge feela go le malahlelwa a motho, mebono ya motho, gona tlhako ya Modimo ya bophelo, Moya wo Mokgethwa, o ka se kgone go šoma. O ka se kgone go fodišwa ge go sa no ba se—se seripana felotsoko, se sego sa be sa bola; e na le dielemente tšohle tša motho, mebono yohle ya sesaense, ohle “matšatši a mehlolo a fetile,” ao a bitšwago. Tšohle di swanetše go, tšohle, e sego go hwa feela, eupša go bola, gomme go tšwa fao go gola tlhako ya Bophelo go ya go Bophelo bjo boswa. Ke tsela e nnoši e ka kgonago go gola.

<sup>103</sup> Ke lebaka leo re sa hwetšego se re se kgopelago. Re leka go tšea, le rena, bontši kudu bja mebono ya rena beng.

<sup>104</sup> Ke lebaka leo kereke ya Lutheran e sego ya kgona go tšwelapele kgolekgole go feta ka mo e dirilego, Mapentecostal le ka moka ga bona; ka gobane ba lahletše, ka sehlopha sa baithutamodimo, “*Le* ga la swanela go ba ka tsela ye. *Le* ke la letšatši le lengwe. Gomme *Le* e be e le la lela.” E dula fao. E ka se kgone go golela go seswantšho sela sa go phethagala sa Kriste go fihla Lentšu le lengwe le le lengwe la Modimo le amogelwa ka



go wena, gomme ka gona o ba Lentšu lela. Le bjalo ka peu ye e ilego ka mobung.

<sup>105</sup> Ke tla rata bona ba hlaloša Bahebere 11:3. Rasaense yo mogologolo re kilego ra ba nae, bokgole bjo ke tsebago, e bile Einstein. Ge mo e sego telele go fetile, ka New York, ke be ke theeditše se a se boletšego. Gomme o be a bolela ka tša lefaufau, le ka fao le bego le le bokgole ntle, gomme o netefaditše gore go be go ne Bokagosafelego. Kafao monna, yo a yago dimaele tše milione tše ntši bjalo ka iri, go tla mo tšea bontši bjalo, goba mengwaga ye milione ya seetša ka iri, go tla mo tšea mengwaga ye mentši bjalo go fihla godimo kua, e tee, dikete tše makgolotharo go ba sengwe go swana le seo, gomme ka gona dikete tše makgolotharo go boa morago. Gomme ka gona o netefaditše ka yona, ka mokgwa wo mongwe, gore monna o be a tlogile lefaseng mengwaga ye masometlhano. Bokagosafelego!

<sup>106</sup> Gomme seo e no ba tše nnyane tša lefaufau, ge Modimo a di budutše go tloga seatleng sa Gagwe! Beibele e boletše! Gomme Einstein mafelelong o tatolotše se, “Go tsela e tee feela motho a ka hlalošago tlhologo ya lefase le, yeo e hwetšwa ka go Bahebere 11:3. ‘Re kwešiša gore mafase a foreimilwe mmogo ke Lentšu la Modimo.’” Yeo ke nnete tlwa. Saense ebile e ka se kgone go le kgwatha. Gomme gona o re ga o dumele ka go mohlolo? O ka kgona bjang go e dira?

<sup>107</sup> Rasaense e ka ba mang o be a ka kgona bjang go hlaloša pula ya Noage, ge go se gwa ke gwa tsoge gwa wa lerothi la pula godimo ga lefase go fihla letšatši leo? Eupša Noage o rile go be go tla ba pula! Gomme ge pula ya Noage e etla, kgahlanong le saense yohle; go be go se maru godimo kua, ga se gwa tsoge gwa ba pula godimo kua. Ba kgonne go netefatša gore go be go se pula godimo kua. Gomme ka gona ge Modimo a butše magodimo godimo gomme a tšholla ntle le—le lefula le le gogotšego go tloša lefase, e be e le kgakgamatšo; ka fao e lego gore nnete ga go kwešišege, ga go hlalošege. Eupša re a tseba gore Modimo o e dirile, ka gobane Beibele e boletše bjalo. Gomme re na le bohlatse lefaseng, lehono, gore go bile bjalo. Modimo o e dirile. Seo e be e le kgakgamatšo.

<sup>108</sup> Ge Modimo a tšere mokgalabje, ka leina la Abraham, ka mengwaga ye masomešupa tlhano bogolo; gomme mosadi wa gagwe, masometshela tlhano, mengwaga ye mentši a fetile nako ya bophelo, menophose. Gomme ge e tšere monna yola gomme a mo fa tshepišo, ka mengwaga ye masomešupa tlhano bogolo; go mosadi yo a bego a nyalane le yena, kgaetšedi seripa wa gagwe—gagwe. Gomme o be a phetše le yena ge a be a sa le mosetsana; ba nyalane ge go le molaleng a be a sa le mo—mo mosetsana wa mahlalagading, gomme mo o be a le masometshela tlhano a mengwaga bogolo. Gomme o rile, “O ya go ba le lesea ka mosadi yo.”

109 Gomme go ka reng ge Abraham a ka be a rile, “Ga—ga—ga ke dumele ka go dikgakgamatšo. Ke—ke no se kgone go amogela seo”? Se ka be se se sa direga.

110 Eupša, le a bona, ge o re o dumela e ka ba eng, gona o swanetše go se bea tirong. Ka gona Abraham o ile a laelwa go ikarotšanya yena mong go tloga go gosedumele gohle, le go sepela le Modimo a nnoši. Gomme go na le go re a fokole kudu, o ile a tia kudu. Gomme ge a be a le mengwaga ye lekgolo bogolo, gomme Sarah o be a le masomesenyane, lesea la tla.

111 Abraham o be a ka kgona bjang go tšea morwa wa gagwe, moragorago leeto la matšatši a mararo, go molaleng dimaele tše masomesenyane go tloga go tlhabologo e ka ba efe, godimo ka ntlhoreng ya thaba moo Morena a mo laeditšego, go ya go neela morwa wa gagwe, Isaka? Isaka a rwele legong godimo, bjalo ka ge re tseba, e lego sekai sa Kriste. Gomme ka godimo ga thaba ye o be a le wa go neela Isaka bjalo ka sehlabelo, gomme ge a phethile se sengwe le se sengwe seo Modimo a mmoditšego eupša go hlabo morwa wa gagwe go iša lehung, go kgabola mogolo wa gagwe, ge a gogile thipa go tšwa sekhwameng le go phagamiša seatla sa gagwe go obamela Modimo, go lentšu! Ka gobane Beibele e boletše, gore, “O tsebile gore Modimo o be a ka se kgone go dira tshepišo ntle le ge A be a ka e boloka. Gomme o mo amogetše bjalo ka yo a tšwago bahung, gore O be a kgona go mo tsošetša godimo le go mo fa yena gape.”

112 Gomme ge a be a le komana go obamela Modimo, go botlalo bja gona, O swere seatla sa gagwe le gore, “Tloša seatla sa gago, Abrahama.” Gomme go be go le kgapa e kgokilwe ka lešokeng, tikologong ya meterebe, ka dinaka tša gagwe, ntlhoreng ya thaba yeo, moo go lego ditau, diphiri, mahlalerwa, diphukubje, le dibata tše kgolo tše šoro tše di jago dinku. Gomme ka gona o be a le tsela godimo ntlhoreng ya thaba mo go bego go se meetse. Kgapa ye e fihlile bjang kua? Abraham o topile matlapa godimo gohle tikologong, go aga a—a aletara. Eupša kgapa e be e le fao, go le bjalo. E be e le kgakgamatšo.

113 Gomme monna e ka ba mang yo a dumelago Modimo le go Mo tšea go Lentšu la Gagwe, ga go tshwenye seemo ke sefe, Modimo o tla dira kgakgamatšo ye nngwe, go boloka Lentšu la Gagwe. Ka gobane, Abraham o biditše lefelo *Jehofa-jireh*, “Morena o inेतše sehlabelo Yenamong.” Le bjale A ka kgona go dira kgakgamatšo go direga. A ka kgona go dira seo morago ga sekgalela se, ge o ka no Mo tšea go Lentšu la Gagwe.

114 Daniele, go tšwa legolong—legolong la go tlala ditau tša go swarwa ke tlala, go kgonegile bjang gore monna yola . . . Go kgonegile bjang go monna yola, go sehlopha sa ditau tša go swarwa ke tlala, a dule le tšona ka leweng, bošego bjohle, ntle le go gobatšwa? Morongwa wa Morena, wa go se bonwe go e ka

ba mang gape, o be a eme kua. E be e le kgakgamatšo. Sengwe se ile sa swanela go raka tau yela gore e se fihle go yena.

115 Ge bana ba Bahebere ba ile ka leubeng la mollo, seo ke kgahlanong le kwešišo yohle ya sesaense, ka go lebaka le legolo lela. E be e se sesaense go motho go lahlelwa ka leubeng, leo le bego le, leo banna ba ba ba tšeešego godimo kua ba senyegile, gomme ba wetše ka leubeng gomme ba phetše ka leubeng lebakana, gomme selo se nnoši le se dirilego le ba tlemolotše ditlemong tša bona. Seo ke kgakgamatšo. Go be go sa hlalošege, go sa kwešišege, eupša efela ke therešo.

116 Joshua šo, yo re bolelago ka yena. Kafao monna yola, e no ba monna wa mehleng yo a nnogo go tla go kgabola se—se—se sehlopha sa dithutotumelo tšeo banna ba di bopilego, le melao le ditirelo, di se ne selo ka go tšona se bolelago e ka ba eng ka go fa monna maatla go emiša letšatši. Eupša mo, ka thomo go tšwa go Modimo, “Ke tla go fa seripa se sengwe le se sengwe sa lebala dikgato tša leoto la gago di gatago godimo. Ke tla ba fao.” Gomme lenaba le be le fenywa.

117 Letšatši le be le theoga. Ge tšona dikgoši di be di ka ba le nako go itliša bonabeng mmogo gape letšatši la go latela, ka nnete o be a tla loba banna. Eupša Joshua o tsebile o be a hloka seetša sa letšatši. Gomme o lebeletše godimo go letšatši, gomme a re, “Ema o šišimale godimo ga Gibeone. Gomme, ngwedi, dula mo godimo ga Ajaloni.” Gomme bakeng sa sekgoba sa letšatši ka moka, bjo e bile bošego bjohle botelele, letšatši le eme go šišimale gomme ngwedi wa ema ka kua. Seo ke kgakgamatšo. Monna yo a sepelago ka go thato ya Modimo o kgonne go dira selo se se bjalo, ka gobane o be a le ka go . . . o be a le gape ka go e—e Efeso, ka go e—e Efeso le—le Ebangedi. Nnete, e be e le kgakgamatšo.

118 Moshe ka phata ka seatleng sa gagwe, go ya tlase go hlakodiša bana ba Israele, e be e le kgakgamatšo, ge Egepeta e be e na le mašole ohle le banna ba bona ba go hlhliwa gabotse. E be e le kgakgamatšo.

119 Tswalo ya kgarebe e be e le kgakgamatšo. Kgarebe e ka kgona bjang, kgahlanong le kwešišo yohle ya sesaense, mosadi yo a sa tsebe go monna, a ka kgona go tšweletša ngwana; e sego feela ngwana, eupša Imanuele, Yo a netefaditšego tlwa se le rilego o tla ba. Seo se kgonegile bjang? E be e le kgakgamatšo. Ka gobane, Modimo o boletše go moprofeta wa Gagwe, makgolo a mengwaga pele, gomme moprofeta o obametše Lentšu la Modimo, gomme Lentšu le boletšwe. “Gomme Lentšu le dirilwe nama gomme la dula magareng ga rena.” Gomme re dumela leo. Nnete, e be e le kgakgamatšo.

120 Ka fao A kgonne go sepela godimo ga meetse, seo e be e le kgakgamatšo. Motho, go ya ka bogolo bja maoto a gago, o ka se kgone go e dira. Eupša O dirile. E be e le eng? Gosehlalošege, eupša e be e le kgakgamatšo. Modimo o e dirile. Re a e dumela.

121 Go fepa batho ba dikete tše tlhano, ka dihlapu tše pedi le dipisikiti tše tlhano? Eupša O dirile. Go oketša e sego feela hlapi, eupša hlapi ya go apewa; e sego feela borotho, eupša borotho bja go apewa. O kgonne bjang go fetola meetse go ba beine? Yohle kgakgamatšo!

122 O fodišitše balwetši, bao, ba nago le lephera. Leo, ga ba na le e ka ba eng, go fihla letšatši le, saense ga e naso, go fodiša lephera, eupša Jesu o le fodišitše ka Lentšu la Gagwe. E be e le kgakgamatšo.

123 Gomme O a swana maabane, lehono, le go ya go ile. Lentšu la Gagwe le sa fodiša balwetši. Ke kgakgamatšo, nnete.

124 O tsošitše bahu, morago ga ge bophelo bja go hwa bo tlogile go bona; Latsaro, morwa wa mosadi wa Naine, le morwedi wa Jairo. O tsošitše bahu, ka Lentšu la Gagwe, ka gobane Yena ke Lentšu.

125 Ka gona selo se sengwe se segolo, go tswaleleng, go netefatša gore O be a le Mesia. Go netefatša se A bego a le sona, O ile a swanela go tla ka lenaneo, le go araba, go Lentšu. Gomme Lentšu le rile, ge A boletše le moprofeta, “Morena Modimo wa lena o tla tsošetša Moprofeta wa go swana le nna godimo.”

126 Fao go bile banna ba bantši ba tsogetše godimo. Gomme go bile, lebaka la makgolo le makgolo a mengwaga, ba be ba se ne moprofeta. Oo, ba bile le baprista le banna ba bagolo, gomme bjalo ka ge re bala histori gare ga Maleaki le Mateo, mengwaga ye makgolonne, go bile banna ba bagolo. Eupša go be go se moprofeta.

127 Gomme ka gona ge A etla tiragalong, go netefatša gore O be a le Baefeso bale ba dirwa go bonagala, Johane o e tsebišitše. Eupša Jesu o be a le Leo, O be a le Lentšu le bonagaditšwe, Yenamong.

128 Ge Petro a tlile go Yena letšatši le lengwe, le Andrea, leina la gagwe e be e le Simone. Gomme ge Jesu a eme mola, a se a ke a tsoge a bona monna ka bophelong bja Gagwe, (theetšeng sekgauswi) ge A be a eme mola gomme a lebelela monna, le go re, “Leina la gago ke Simone, gomme o morwa wa Jona.” Seo ke kgakgamatšo. Nnete e be e le. Ka nnete e be e le kgakgamatšo.

129 Gomme ge Filipi, o be a eme mola, o kwele se gomme o tsebile bjohle boitsebišo gore yo e be e le Mesia, o be a le nnete. O e dumetše. O be a se a swarwa ke bogatšu, ebile o be a se sefofu. O kitimile go dikologa leši, dimaele di se kae, gomme a hwetša mogwera wa gagwe, a bitšwago Nathaniele. Gomme ge a etla a sepelela godimo. . . Tumelo ya monna yola, yo a kgonago go tliša yo mongwe kopanong, go bona!

130 Ge a sepeletše godimo pele ga Jesu, Jesu o rile, “Bonang, MoIsraele šole, ka go yena ga go bomenetša.”

131 E makaditše monna. O rile, “O ntsebile neng?” Bjale hlokomela, se ga se kwešišege. Ga—ga se hlalošege. O rile, “O ntsebile bjang?”

132 O rile, “Pele Filipi a go bitša, ge o be o le ka tlase ga mohlare, Ke go bone.” Kgakgamatšo!

133 O bile le tlhoko, go ya go feta Samaria. Gomme ge A ile go feta Samaria, toropokgolo ya Sikara, O be a dutše ntle kua a letile barutiwa ba Gagwe go ya ka gare go reka dijo. Gomme, elang hloko, mosadi o tlile ntle sedibeng, wa tumo ye mpe. Gomme O rile go yena, “Mosadi, eya go Ntlela le seno, goba Ntlišetše seno.”

134 Gomme o rile, “Ga se setlwaedi go Wena go kgopela seo. Rena re, ke nna Mojuda . . . goba Mosamaria, gomme O Mojuda. Ga re ne—ne tirišano le Lena.”

135 O rile, “Eupša ge o ka be o tseba Yo o bego o bolela le yena!” Šetša kgakgamatšo ye go itokišetša go direga. O se e foše. O rile, “O kgona go dira bjang—bjang, go bolela se? Nna, ke nna mosadi wa Samaria, gomme O Mojuda. Ga re ne tirišano.”

136 O rile, “Eupša ge o ka be o tseba Yo o bego o bolela le yena, goba Yo a bego a bolela le wena, o—o be o tla Nkgopela seno.” Gomme O ile pele go fihla A hweditše mo bothata bja gagwe bo bego bo le. Gomme O rile, “Sepela o tšee monna wa gago gomme le tle mo.”

Gomme o rile, “Ga ke ne le ge e ka ba monna.”

137 O rile, “Yeo ke therešo. Ga o ne monna, ka gobane o bile le ba bahlano, gomme yo o dulago le yena bjale ga se monna wa gago. Kagona, o boletše therešo.”

138 O rile, “Mohlomphegi, ke a bona gore O moprofeta.” Ga se ba ke ba bona yo motee lebaka la mengwaga ye makgolo. O rile, “Re a tseba me—me Mesia o etla, gomme, ge A etla, O tla re botša dilo tše.”

O rile, “Ke nna Yena.”

139 [Ga go selo godimo ga theipi—Mor.] E be e le kgakgamatšo e bonagatšwa, gomme go hweditšwe go ba Therešo ya Ebangedi; Ebangedi ye e tshepišitšego se, gomme mo e diregile le go hlatšetša se e bego e le sona.

140 Bjale a ke le feng kgakgamatšo ye kgolo ya go hlomphega mo, motsotso feela. Ka go Johane 14:12, Jesu o boletše, tshepišitše go re, “Modumedi yo a dumetšego go Yena, o tla dira mediro ya go swana.” A ke nnete? Modimo, Yo a dirago molao goba tshepišo, o swanetše go boloka tshepišo yeo, go ba Modimo. O a e boloka. Go nagana, Modimo . . . Gobaneng, Ke kgakgamatšo, Sonamong; ka gore Modimo, Yo a dirago tshepišo gomme a se robe tshepišo yeo, go fa tshepišo ya dilo tše A di dirilego, go batho ba Gagwe, go latela go kgabola ntle lebaka go fihla A boa gape. “Eyang lena ka go lefase lohle, rerang Ebangedi go sebopiwa se sengwe

le se sengwe; sebopiwa se sengwe le se sengwe, lefase lohle. Yo a dumelago gomme a kolobetšwa o tla phološwa, gomme yo a sa dumelego o tlo ahlolwa; gomme maswao a a tla latela bona ba ba dumelago.” O swanetše go boloka Lentšu leo. Gomme ka gobane O le boletše, le ile go tšwa molomong wa Gagwe, le swanetše go phethagatšwa.

<sup>141</sup> Lengwalo lohle le swanetše go phethagatšwa. Kafao ke kgakgamatšo, e nnoši, go kwa Jesu, Morwa wa Modimo, a dira setatamente se se bjalo ka seo, “Dilo tše Ke di dirago le tla di dira le lena.” Bjale Beibele e boletše, ka go Bahebere 13:8, “O a swana maabane, lehono, le go ya go ile.” Seo ke kgakgamatšo, gobane e swanetše go dirwa. “Magodimo le lefase di tla feta, eupša ga go Lentšu le tee le Nkilego ka le bolela le tla tsogego la palelwa,” O boletše. Le swanetše go dirwa.

<sup>142</sup> Bjale, bagwera, ke a dumela gore O a swana maabane, lehono, le go ya go ile. Ke a dumela O sa no kgona morago ga sekgalela se go dira, ka moagong wo, kgakgamatšo, ka gobane gore O tshepišitše e tla direga.

<sup>143</sup> Gomme O tshepišitše bontši kudu bjang, ke bontši kudu bjang bo hlahlalago ka Beibeleng, go fihla go lona lebaka le re le phelago, Baefeso gape, ba mabaka a kereke. Re na le mabaka a šupa a kereke, gomme re a tshepiša gore ka go Lebaka la Kereke ya Laodikia go tla ba Baefeso ye nngwe. Yeo ke nnete. Gomme re mo. Ke a dumela, ka pelo ya ka yohle, gore Jesu Kriste Yo a dirilego tshepišo . . .

<sup>144</sup> Bjalo ka ge ke boletše ka go molaetša wa ka wa mafelelo, ke be ke eme godimo kua kgahlanong le leboto lela, ge ke be ke le mo dibeke di se kae tša go feta. Nako le nako ge o sepediša monwana wa gago, woo o ya go dikologa le go dikologa lefase, ga o tsoge wa ema. Mosepelo wo mongwe le wo mongwe o o dirago, o tla o bona mo Kahlolong. Thelebišene e netefatša gore o mo, sekgao sa bone. Gobane, thelebišene ga e bope seswantšho seo, e no tšhanela feela lephoto lela ka go tšhupu, gomme o bona seswantšho. Mmala, se sengwe le se sengwe, selo se sengwe le se sengwe se sepelago se se diregago ka lefaseng, se ya thwi go dikologa go kgabola mo bjale, go dira rekoto. Letšatši le lengwe, rekoto ya gago e ya go tswalelwa, gomme o ya go arabela go rekoto yela. Yeo ke nnete.

<sup>145</sup> Modimo, a nke ke hlakane kudu, a nke ke hwe kudu go nnamong le go e ka ba eng go ntikologa, eupša ke lemoge Lentšu la Modimo wa go phela magareng ga rena lehono!

A re rapeleng.

<sup>146</sup> Morena Jesu, Wena o kgakgamatšo, ge Modimo a dirilwe nama. Ke a rapela, Tate wa Magodimong, gore O tla bonagatšwa Wenamong morago ga sekgalela se, go netefatša go rena mo lehono. E sego feela go netefatša go rena . . . Go na le, ke a nagana, diphesente tše masomesenyane, goba go feta, tša batho ba dutše mo, ba dumela leo, Lentšu le lengwe le le lengwe. Eupša gore

re bone Wena gape, le go dira go tseba gore Lentšu le leo O le boletšego, le le sa sepele go dikologa le go dikologa lefase, go no swana le rekoto, a nke re sepelele ka go rekoto yela, lehono, Morena. A nke re sepeleleleng ka gare gomme e sego go e kwa feela boka e be e etla la bobedi, go tšwa molomong wa monna; eupša a nke molomo woo, le motho le motho, bohle ba dutšego, ba be Lentšu la Gago. Re komana go hwa, Morena, go mebono ya rena beng, go no bona Wena o boloka tshepišo ya Gago, “Dilo tše Ke di dirago le tla di dira le lena.” Ke a rapela gore O tla fa se Leineng la Jesu. Amene.

147 Feela pele re bitša mothalo wa thapelo. Ke be ke na le mokgemo wo monnyane wa aesechrimi letšatši le lengwe, le mogwera wa ka wa ngaka wa kgale. O rile, “Ke nyaka go go botšiša se sengwe, Billy.”

Ke rile, “Go lokile.”

148 O rile, “A o dumela ka go . . .” Fao ke mo ke hweditšego kgopolo ye, *kgakgamatšo*. O rile, “A o dumela ka go kgakgamatšo?”

Ke rile, “Nnete.”

149 O rile, “Ke—ke a tseba o a dira.” O rile, o mpoditše ka motho yo mongwe yo a fodišitšwego, a rapeletšwego; gore o rekišitše diokobatši tša dihwahwa go, lebaka le mengwaga, dinako tše dingwe ba be ba eba le ditsikitlano tše šupa goba seswai ka letšatši; dihlare tše maatla. Gomme o rile, “Ga se ba tsoge ba tletše tše dingwe morago. Gomme ke ba bone nako yohle; ga se ba tsoge ba ba le yona gape.” O rile, “Ke nyaka go go botša se sengwe, go no go dira o tsebe ke—ke dumela seo o bolelago ka sona.”

150 O rile, “Lebakeng la nako ya phuhlamo ya ekonomi, morwa wa ka mo bjale o be a le godimo ga lebenkele.” O rile, “O be a—o be a thuša mohuta wa mothaka yo moswa, o nno re o . . . Ba be ba eme tlase ka mothalong, bakeng sa sehlare.” Gomme o rile, “Monna o tlile godimo mo, gomme o be a ne mosadi wa gagwe,” o rile, “mosadi yo monnyane, o be a . . . O be o kgona go mo lebelela le go bona o be a le kgauswi le go belegišwa e ka ba nako efe, ga ngwana.” Gomme o rile, “O be a no se kgone go ema ka mothalong wola gape, kafao o—o tlišitše mosadi wa gagwe ka lemating, le go no itshama godimo ga legetla la gagwe.”

151 Gomme o rile, “Mošmane wa ka o ile godimo, a re, ‘A nka go thuša?’ O rile, ‘Ee,’ o rile, ‘taelotšhomišo ya go tšwa go ngaka še. Eupša,’ o rile, ‘Ke nyaka go e hlakiša go wena.’ O rile, ‘Nna . . . ga se ra be ra ba le tšhelete go le bjalo.’ O rile, ‘Re tla e hwetša go tšwa go kgoro, eupša mosadi wa ka a ka se kgone go ema boteleletelele. Ngaka o rile o swanetše go ba le sehlare gonabjale.’ Gomme o rile, ‘Ge o ka no mo fa sehlare, ke tla ya thwi kua le go ema ka mothalong go fihla ke—ke hwetša tšhelete go tšwa go kgoro.’

152 “Gomme mošemane o rile, ‘Mohlomphegi, ke manyami.’ O rile, ‘Ke kgahlanong le ya rena—ya rena melawana mo, go fa sehlare ntle le go ba le tšhelete.’ Le tseba ka mo dinako di bego di le ka go wona matsatši. Gomme o rile, ‘Ke—ke mo kwela bohloko, eupša nka se kgone go e dira.’”

153 O rile, “Ke be ke dutše morago mo ke bala lephephe. Gomme ke lebeletše godimo, gomme,” o rile, “sengwe sa go se tlwaelege se rutheditše pelo ya ka.” O rile, “Ke sepeletše godimo, ka re, ‘Ema motsotso, morwa, ema motsotso.’ Monna o thomile go tšwa mojako, o rile, ‘Gabotse, go lokile, morwa,’ o thomile go tšwa mojako.” Gomme o rile, “Ke rile, ‘Motsotso feela,’ ke rile, ‘e be e le eng seo?’ O rile, ‘Gabotse, monna yo . . .’ O e hlalošitše go yena.”

154 O rile, “‘A ke bone taelotšhomišo.’ O rile, ‘E no ema motsotso, morwa, ke tla go hweletša sehlare.’”

155 O rile, “Ke ile godimo morago le go hlakanya godimo taelotšhomišo ngaka a e laetšego godimo ga pampiri ya gagwe.” Gomme o rile, “Ke ile godimo kua, le go ba le tšhelete yeo.” O rile, “Ka mo neela sona, ke sa tsebe ge eba ke be ke tla e hwetša goba aowa, eupša ke ile ka no nagana ke be ke tla dira.” O rile, “Ke nno ikwela gore ke be ke swanetše go e dira.” Gomme o rile, “Billy, ge ke bea sela—sela sehlare ka seatleng sa mosadi yola,” o rile, “e be e le Morena Jesu.” O rile, “Ke bone Monna a eme fale.” Gomme o rile, “Ke badile morago, gore Lengwalo le rile, ‘Bontši bjo le bo direlago ba bannyanyane ba, ba bannyane ba Ka, le se diretše Nna.’” O rile, “Billy, go diregile eng go mahlo a ka? A gabotse ke e bone?”

156 Ke rile, “Ee, mohlomphegi. Ke a e dumela. Ke a dumela gore o phethagaditše mošomo wa gago bjalo ka radiokobatši, ka go tlhokego ya tšhoganetšo ya seo. Jesu o rile, ‘Se o se dirilego go ba bangwe ba, o se dirile go Nna.’ Ke a e dumela.”

157 Gomme ke dumela selo seo se swanago lehono, thwi mo go ba gona le batho ba, gore Jesu Kriste a ka kgona go iponagatša Yenamong, a itira Yenamong Lentšu le le dirilwego nama magareng ga rena morago ga sekgalela se. A le ka e dumela? [Phuthego e re, “Amen.”—Mor.] Morena a le šegofatše.

158 Bjale re ya go bitša dikarata tša thapelo, gore batho ba tle. Gomme re ka se kgone go hwetša bontši kudu, ka gobane ke a nagana bjale, ge ke lebeletše sešupanako thwi, ke na le metsotso ye masomepedi tlhano go fihla re swanetše go tswalela feela ka iri ya bone, ka nako, eupša re tla tšwelapele. Bjale a re thomeng go tšwa go karata ya thapelo, ke a dumela e be e le A. A e be e le? A, a re yeng go tloga go A, tee.

159 Ke mang a nago le karata ya thapelo A, tee? Ke no le bitša o tee ka nako, kafao ge o golofetše re ka kgona go go rwala. Go lokile. Karata ya thapelo A, tee. Ke mang a nago le yona, phagamišetša seatla sa gago godimo, felotsoko ka moagong? Karata, moragorago ka morago. A o ka tla, mohumagadi, ge o



ka kgona. Tee, pedi, ke mang a nago le karata ya thapelo pedi? A, pedi, a o ka phagamišetša seatla sa gago godimo ge o . . . A o kgona go sepela? Go lokile, etla thwi godimo mo, eya lehlakoreng le. Tharo. Ge o ka phagamiša seatla sa gago gonabjale, nka—nka kgona go go hwetša, ga ra swanela go letela botelele kudu. Karata ya thapelo nomoro tharo, a o ka phagamišetša seatla sa gago godimo. Go lokile, monna fase moo. Go lokile, etla godimo mo, mohlomphegi.

<sup>160</sup> Karata ya thapelo nomoro nne, a o ka phagamiša seatla sa gago ka pela bjale, feela ka pela kafao ka kgonego o ka kgonago. Karata ya thapelo nomoro nne. Go lokile. Nomoro tlhano. Feela bjalo ka ge ke bitša, o emele godimo, nomoro tlhano. Go lokile. Nomoro tshela, nomoro šupa, nomoro seswai, nomoro senyane, lesome—lesome. Bjale, tee, pedi, tharo, nne. . . Lesome, go lokile. Lesometee, lesomepedi, lesometharo, lesomenne. A o be a etla, mohlomphegi, lesomenne? Go lokile. Lesomenne, lesometlhano. Gabotse, yeo, yeo e tla ba . . . Go tla lekanela thwi bjale, go tla lekanela morago ga sekgalela se, gobane ga re na le nako ye ntši kudu.

<sup>161</sup> Bjale lebelelang. Ke le nyaka le mphe šedi ya lena ya go se arogane. Bjale, Jesu o dirile tshepišo ye, gore, “Lebakana le lennyane, gomme lefase le ka se Mpone gape, efela lena le tla Mpona.” A le dumela seo? [Phuthego e re, “Amene.”—Mor.] “Lefase,” *lefase*, ke “tshepedišo ya lefase.” Le a bona, gore, O tsebile ba tla ya pele go fapoga ka difešene le dilo. “Eupša ba ka se Mpone gape, efela le tla Mpona.” Ka gobane O tshepišitše, “Ke tla ba le lena, ebile go fihla bofelong bja lefase.” A yeo ke nnete? [“Amene.”] Gomme Beibele e rile, Bahebere 13:8, “O a swana maabane, lehono, le go ya go ile.” A le dumela seo? [“Amene.”] Yeo ke tshepišo.

<sup>162</sup> Bjale, ga wa swanela go ba godimo mo, go fodišwa. Selo se nnoši o swanetšego go se dira ke go dumela Lentšu lela go ba Therešo. Bjale ke ya go le kgopela, ge le ka rata, go no ba tlhomphegolo le go homola bakeng sa dinakwana di se kae.

<sup>163</sup> A bona bohle ba tlile ka gare, Billy? Go na le ba babedi ntle, ba bararo ntle? O reng? [Ngwanešu o re, “Ba bararo gape.”—Mor.] Ba bararo gape? Nomoro tharo, karata ya thapelo nomoro tharo. Eng, bjang, lentšu la Semexico la yeo ke eng, tharo? Mang kapa mang a ka kgonago go le bolela? [Yo mongwe o re, “tres.”] Go lokile, ka nnete ba e kwele. Eng, yeo, e ka ba mang yo a nago le karata yeo ya thapelo, etla ka mothalong, o tla dira? Oo, ya. Oo, ke a nagana e bile yo mongwe o bile le yona, gomme o be a sa e tsebe, gomme ba boetše morago. Go lokile. Bjale, bjale go reng ka . . .

<sup>164</sup> A yo mongwe le yo mongwe o a dumela bjale ka yohle ya gago—pelo yohle ya gago? Gabotse, gona a re rapeleng gape.

<sup>165</sup> Morena Jesu, bjale re a lemoga gore re kgona go bala Lentšu, ka bokaonekaone bja rena bja tsebo ya rena, go Le hlaloša. Eupša, Morena, ke Wena o nnoši O ka kgonago go Le tlišetša. Ke Wena o nnoši O ka kgonago gore Le nepile goba go fošagala. Gomme, Tate, ke a rapela lehono gore O tla dira mahlo a batho go bulega. A nke re bone kgakgamatšo morago ga sekgalela se, feela, Morena, go lekanela go dira batho ba bone gore Wena o gona, gore Wena ga o—ga o ka ntle ga go phela, gore Lentšu la Gago le a swana maabane, lehono, le go ya go ile. Ke gore, Wena o Lentšu leo. Bakeng sa bolwetši, Morena, bakeng sa bao ba tlaišegago; go molaleng ba bantši ba mo go tšwa dikarolong tša go fapana tša naga, dikarolo tša setšhaba, ba swanetše. . . ba tlaišega bjalo, ba ka se kgone go ipshina ka dikopano, ge e se ge, ge ba be ba se ba fodišwa. Ke a rapela gore O tla ba fodiša. E fe, Morena. Gomme bjale re no ba batho ba nama, gomme re ka kgona feela go rera Lentšu le go bolela se O se boletšego go ba Therešo, bjale ke Wena Yo a ka se dirago kgonthe. Ke a rapela gore O tla se fa, Leineng la Jesu. Amene.

<sup>166</sup> Bjale ke tla nyaka šedi ya lena ya go se arogane, feela nakwana, gomme ge yo mongwe le yo mongwe a ka no dula bjale bakeng sa metsotso e se mekae. Bjale, bokgole bjo ke tsebago, nnete, ga ke tsebe e ka ba mang yo ke kgonago go mmona ka gare—ka gare ga moago, yoo nka mo tsebago ntle fao. Bjale, ga wa swanela go ba mo go fodišwa, mang kapa mang o tseba seo. Le a bona?

<sup>167</sup> Go be go le mosadi yo monnyane, nako ye nngwe, ga se a ke a kgona go hwetša karata ya thapelo, re ka rialo, gomme o kgwathile seaparo sa Gagwe. Gomme O retologile go dikologa le go lebelela, le go re, “Ke mang a Nkgwathilego?” Gomme bohle ba e ganne. Gomme O lebeletše go dikologa gomme a bona mosadi yo monnyane yo. Ga se a kgona go ikuta yenamong, gobane, le a bona, Moya wa Modimo, woo o bego o le ka go Yena, o Mo etilepele. O be a le Lentšu. Gomme le etilepele thwi go ya go yena, gomme O mmoditše se bothata bja gagwe bo bego go le sona. O be a na le bothata bja madi, gomme o ile a fodišwa. O e dumetše. Gomme ka bjako, ka mmeleng wa gagwe, o ikwetše gore bothata bja madi bo eme (a ke nnete?) bo eme thwi fao.

<sup>168</sup> Bjale O sa no swana lehono. Ga wa swanela go ba mo. Bjale, Beibele e boletše seo ka go Testamente ye Mpsa bjale, go re, “Jesu Kriste ke Moprista yo Mogolo wa rena.” A re dumela seo? [Phuthego e re, “Amene.”—Mor.] Moprista yo Mogolo a nnoši re nago nae, Mmoelanyi a nnoši re nago nae gare ga Modimo le motho, ke Monna, Kriste Jesu. A le dumela seo? [“Amene.”] Gomme Beibele e rile, “Yena ke Moprista yo Mogolo a ka kgonago go kgwathwa ke maikutlo a mefokolo ya rena.” A ke nnete? [“Amene.”] Ke ba bakae ba tsebago therešo yeo? Phagamiša seatla sa gago gore ba. . . Go lokile. Ga ke magareng ga basetsebje, ka Lentšu le.

169 Bjale O be a tla dira bjang ge o be o Mo kgwathile? O be a tla dira go swana ka mo A dirilego ge A be a le mo, ka gobane O a swana maabane, lehono, le go ya go ile. A ke nnete? [Phuthego e re, “Amene.”—Mor.]

170 Bjale e no dumela. O no re, “Bjale, Morena, ke bile ka dikopanong tše ke bilego, eupša ke no ya go dumela, lehono. Ga—ga ke ye ebile go tšea mogopolo ka nnamong. Ke ya go no dumela ka pelo ya ka yohle, gore Wena o mo. Gomme ke na le tlhoko, gomme O no. . . O nthuše, Morena.” Le a bona? Bjale dira seo. Se tšhoge; go no—go no tshepega go iketla.

171 Mpho ya tumelo ga se sengwe o se tšea go le go dira se sengwe ka sona. Mpho ya tumelo ke go no itloša tseleng wenamong. Mpho ke go tloša wenamong ntle ga tsela.

172 Bjale mo go eme mosadi. Tate Modimo o a tseba, bokgole bjo nkilego ka bo tseba, ga se ka ke ka tsoge ka bona mosadi ka bophelong bja ka. Ke mosetsebje moka go nna. Eupša, gomme ga go e ka ba batho ba babedi goba ba bararo ke kgonago go ba bona ntle fao, ke a dira.

173 Ke a nagana yo ke Mdi. Vayle a dutšego mo, mosadi wa Ngwanešu Lee. Ga ke ne nnete. Ka gona ke tseba bašemane ba bararo goba bane ba ba dutšego thwi go bapela mo. Bokgole bjo ke tsebago, ke bohle ke ba bonago ka kopanong ka nako ye, ba ke ba tsebago. Ke a dumela ke Ngwanešu Anthony Milano a dutšego fale, go tšwa New York. Ngwanešu Pat Tyler go tšwa Kentucky. Ka ntle ga fao. . . Ke a tseba Fred Sothmann o ka kua felotsoko, ke mo kwele a goelesa “amene” lebakana la go feta. Ao, ao e ka ba magomo, gomme Tate wa Magodimong o tseba seo.

174 Gomme mosadi yo a emego mo, gomme ga se ke tsoge ka mmona. Ga ke ne mmono wa se a lego mo ka sona. E no ba mosadi o tla godimo mo sefaleng, go swana le ge le dutše ntle fao.

175 Bjale, ge mosadi yo a na le tlhoko, gabotse, gona ke—ke, ge ke be nka kgona go mo thuša, nnete ke—ke be ke tla e dira. Eupša bjale ke—ke. . . Seo se ya le ka se a se hlokago. Ge e le tšhelete, nka—nka no goga godimo ditolaro tše tlhano goba tše lesome. Ka ntle ga fao, ga ke tsebe, le a bona, ntle le ge nka mo fa tšheke ye e beetšwego letšatšikgwedi la pele, go fihla ke hwetša mogolo wa ka kgwedi ya go latela. Eupša bjale go ka reng ge eba o na le bothata bja legae? Gona ke tla re, “Hwetša monna wa gago, a re boleleng mmogo, mohlomongwe nka kgona go le thuša. ‘Ga ke ne tsela ya go fihla gae?’ Gabotse, ke tla kgopela yo mongwe ge eba ba tla go tšea, ba go tšeela gae, ba yago ka tsela ya gago. O dula tlase mokgotheng ofe tlase mo?” Goba e ka ba eng e lego yona, ga ke tsebe. Eupša ge e le bolwetši, gona ga—ga ke tsebe. Le a bona? Eupša ga ke tsebe mosadi.

176 Eupša go na le yo Mongwe mo, Lentšu leo, le le tshepišitšwego, “Dilo tše Ke di dirago le lena le tla.”

177 Bjale, mohlomongwe, go ka reng ge mosadi yo a babja, mohlomongwe o na le kankere, mohlomongwe o na le TB, le, goba se sengwe seo sehlare se ka se kgonego go thuša ka go le—go le legato? Gabotse, bjale, nka se kgone, ga go ka mokgwa wo mongwe nka kgonago go fodiša mosadi.

178 Eupša bjale ge A ka kgona go nkutollela se a se nyakago, go no swana le ge A dirile mosadi sedibeng, goba go no swana le ge a boditše Nathaniele, goba—goba a boditše Simone leina la gagwe e be e le mang. O rile, “Leina la gago o Simone. O morwa wa Jona. Go tloga mo go ya pele o tla bitšwa *Petro*, go ra gore ‘letlapa le lennyane.’”

179 Gabotse, bjale, ge A ka dira selo sa go swana le seo mo ka bogoneng bja lena bohle, seo se ya go laetša gore Lentšu lela ke Therešo. Bjale, ke ba bakae ba tla dumelago seo? [Phuthego e re, “Amené.”—Mor.] A go na e ka ba mang mo a tsebago mosadi, phagamiša seatla sa gago, batho e ka ba bomang ka moagong? Ya, bontši bja lena le a mo tseba. Go lokile. Gomme Tate o a tseba gore ga ke dire. Gabotse, bjale, a re nong go bona se A tla se bolelago. Gomme seo, a seo e tla ba kgakgamatšo? [“Amené.”] Ga ke tsebe bothata ke eng ka yena. Ga ke tsebe o mo bakeng sa eng, goba ga go selo ka yena. Eupša Modimo o tseba seo.

180 Ke ya go bolela le mosadi. Bjale yo ke motho wa pele ke bilego le yena pele ga ka, e ka ba dikgwedi tše tharo. Bjale ke no nyaka go bolela le mohumagadi, nakwana feela. Gomme seo ke eng? Go kgokagana le moya wa gagwe. Go no swana le ge Jesu a dirile mosadi sedibeng, o kgokagane le moya wa gagwe.

181 Bjale, ge Morena Jesu, mohumagadi, a ka kgona go utolla go nna bothata ke eng ka wena, goba o mo bakeng sa eng, goba se sengwe ka sona, seo o tsebago gore ga ke tsebe selo ka sona, goba se sengwe ka mokgwa woo, a o tla dumela e be le Yena? E swanetše go ba Yona, a e ka se ke? [Kgaetšedi o re, “Ee.”—Mor.] E swanetše go ba Yena. Ge A ka e dira, gona bohle re tla leboga gore re a tseba re . . . gore Lentšu la Gagwe ke therešo, gona re ka bea tshepo ka go leo.

182 Bjale, ge A ka kgona go utolla se bothata bja gago bo lego, go nna, gomme nna ke sa go tsebe, gomme o tseba seo; eupša bjale ge A ka kgona go utolla go nna se bothata bja gago bo lego, goba se sengwe ka wena, gona seo se laetša gore go ne Moya mo, felotsoko, wo o go tsebago, gomme o a tseba gore ga ke tsebe. Kafao e ka se be motho, e tla ba Moya. Gomme seo ke se Modimo a se tshepišitšego mo nakong ye ya Efeso. A o dumela seo go ba Therešo? [Kgaetšedi o re, “Ee, ke a dira.”—Mor.] A nke A e fe.

183 Ke bona selo se tee, o tlaišega ka se sengwe sa go swana le bothata bja disaenase godimo *mo* ka hlogong ya gagwe. Yeo ke therešo. A ke yona? Phagamišetša seatla sa gago godimo ge yeo e le yona. Eupša disaenase di ka se go dire gore o ethimole le go tšwelapele ka mokgwa woo, ka fao o na le tengkhubedu, gape.

Yeo ke nnete. Ga o tšwe Phoenix. O tšwa moo go—go lego dithaba tše ntši, mehlare. O tšwa Flagstaff. Yeo ke nnete. A o a dumela Modimo a ka mpotša o mang? [Kgaetšedi o re, “Ee.”—Mor.] O Mdi. Earl. Ya. [“Nnete.”] A ke nnete, ke yona? Bjale tloga, o dumela, go tla fela gohle.

<sup>184</sup> Bjale A o a swana maabane, lehono, le go ya go ile? [Phuthego e re, “Amene.”—Mor.] Bjale, Tate wa Magodimong o a tseba ke sa tšo bona mosadi. Bonang Lentšu le hlatsetšwa. Bjale, ga se nna, ke no ba motho. Go no swana le setšeamantšu se, ke semuma ka ntle le ge nna ke bolela ka sona, goba yo mongwe. Gomme kafao monna e no ba semuma. Eupša ke Moya, gomme Moya woo o ntle thwi fao magareng ga lena. Le a bona? Yena ke mofodiši, e se go nna.

<sup>185</sup> O dira bjang, mohlomphegi? Monna yo mongwe e lego mosetsebe go nna. Ga ke tsebe monna. Bjale, bokgole bjo ke tsebago, ga se ke tsoge ke mmone ka bophelong bja ka.

<sup>186</sup> Eupša bjale Moya, Moya wo Mokgethwa, Moya wo Mokgethwa le Jesu Kriste ke Moya wa go swanamong. Motlotšwa, Jesu, Monna, e be e le Morwa wa Modimo, eupša Moya wo Mokgethwa wo o bego o le go Yena e be e le Modimo. “Tate wa Ka o dula ka go Nna.” Le a bona, ke Moya wo Mokgethwa, kafao e sa le Modimo.

<sup>187</sup> Bjale ge nka no itloša nnamong, monna yola a ka kgona go itloša mong, go tloga tseleng, gona karolo yela e hwile, ka gona go dumelela Moya wa Bophelo go ya go šoma. Le a bona? Ke ka baka leo ke letago motsotso feela, go bona se se diregago go fihla ge tlotšo e thoma.

<sup>188</sup> Ge Morena Modimo, Yo re lego ka Bogoneng bja gagwe, a ka utolla go nna, mohlomphegi, se bothata bja gago bo lego, goba se sengwe se o se dirilego, goba—goba se sengwe ka wena, feela se sengwe. Nnete, ge re bolela kudu, ke kudu e tla tlogago. Eupša, le a bona, go na le ba bangwe ba eme ka mothalong. Eupša ge A ka no mpotša se bothata bja gago e lego, a o tla ntumela go ba mohlanka wa Gagwe, le go dumela O gona? [Ngwanešu o re, “Ee.”—Mor.] Go phatloga. A ke nnete? [“Nnete ke yona. Ee.”] Nnete.

<sup>189</sup> Bjale le re, “Seo se dirilwe bjang?” Ke duma ge nkabe ke tsebile. Ga go a ka kgonago go hlaloša seo. Seo ke kgakgamatšo. Le a bona?

<sup>190</sup> Mo, gore o kgona go tseba, ke bone se sengwe gape, tlhahlobo; o na le bothata bja pelo, gape. Phagamiša seatla sa gago. Mna. Anderson, o ka kgona go ya gae bjale, Jesu Kriste o tla go dira o fole. Yeo ke nnete. E no dumela, eba le tumelo. Se belaele.

<sup>191</sup> O dira bjang, mohlomphegi? Re basetsebane seng. Ga ke go tsebe. Bokgole bjo ke tsebago, ke lekga la mathomo nkilego ka go bona, go nna go go tseba. Yeo ke nnete. Eupša O a re tseba, bobedi bja rena.

192 Bjale a o a tseba gobaneng se se direga? Ke mogau wa Gagwe o a se dumelela, gore se tla tliša batho ba go lemoga Modimo. Bjale, ga ke tsebe selo ka wena, ebile ga ke go tsebe ka tsela ye, feela monna wa go se tlwaelege yo a tlogo mo. Bjale e tla ba kgakgamatšo ka kgonthe sa se sengwe go direga, go—go tseba sa phošo ke eng ka wena, goba se sengwe o se dirilego, goba se sengwe o bego o se wa swanela go be o se dirile, goba se sengwe o swanetšego go be o se dirile, goba o mang goba se sengwe ka wena. E swanetše go ba kgakgamatšo, gobane ga go tsela go e ka ba mang go tseba seo, ka ntle ga kutollo tsoko ya di sa bonwego. Yeo ke nnete. Bjale ge A ka dira seo go wena, gare ga gago le nna, gore batheeletši . . . e sego pontšho, eupša gore ba tla bona ba—ba Baefeso e mo, gore se ke selo se se dirago leporogo gare ga kereke ya leina le Naga ya Letago. O e tshepišitše, gore ba kgone go netefaletšwa gore re ba botša Therešo.

193 Bjale go go tseba, o a tseba ga ke dire. Ke gore, phagamišetša seatla sa gago godimo gore batho ba bone gore o . . . Nna, ga se ka ke ka tsoge ka bona monna ka bophelong bja ka. O no ba monna o eme mo. Botšiša e ka ba mang wa ba bangwe. Eupša o tlaišega ka go phatloga. Gape o na le diphaele. Yeo ke nnete. O tšwa tsela ye telele, go tla mo. Ebile ga o Moamerika. O Mocanadian. O tlile le morwa yo a nago le tlaišego ya monagano. Yeo ke therešo. O nyaka ke go botše mo o tšwago? O tšwa profenseng ya Saskatchewan, Saskatoon toropokgolo. Dumela ka pelo yohle ya gago, gomme Modimo o tla go romela morago gae o fodile, le morwa wa gago, ge o dumela. A o a e dumela? Modimo a go šegofatše.

194 A le a dumela? [Phuthego e re, “Amene.”—Mor.] Morena Modimo o sa no dula a le Modimo. Le a bona? Ga go yo mongwe eupša Yena.

195 O dira bjang? Mohumagadi šo, mosetsebje go nna, mohlomong yo mogologolo gannyane. Ga se ka tsoge ka mmona; eupša o—o no ba mosadi o eme mo. Ke ya go swanelwa ke go hlaganela, gobane ke no ba le metsotso ye šupa goba seswai bjale, le a bona. E no lebelela mo. A o a dumela gore dilo tše ke therešo? Ka pelo ya gago yohle? O a tseba ga go kgonege go nna go tseba se se fošagetšego ka wena, goba e ka ba eng ka wena. Eupša ga se go se kgonege go Modimo go tseba, ka gobane O tsebile pele ebile go be go le lefase. A yeo ga se nnete? [Kgaetšedi o re, “Yeo ke nnete.”—Mor.]

196 Ke ba bakae ba dumelago seo go ba therešo! [Phuthego e re, “Amene.”—Mor.] Nnete. O tseba nako ye nngwe le ye nngwe ge o panya leihlo la gago. Yena ga a ne magomo. Gomme e no nagana; ka mogau wa Gagwe O neetše, ka Ebangedi ya Gagwe, selo sa go swana A tshepišitšego go se dira. Ka gona go na le Legodimo, gomme re ya go lona. Gomme re ka go Efeso ye thwi bjale. Re ka go ye, re tšwa ka go e tee, go ya ka go ye nngwe.

197 O na le dilo tše ntši tša go fošagala ka wena, ditharagano, dilo tše ntši kudu tša go fošagala. Gomme ga o tšwe mo. O tšwa bodikela bja mo. O tšwa California. Yeo ke nnete. Gape o na le morwa yo a tlaišegago. Yeo ke nnete. O . . . Go na le se sengwe, ke tšwelapele ke bona meetse goba letsha le legolo. Oo, ke, o na le—o na le yo mongwe yo a lego kgauswi le wena, yo a dulago ka Chicago, yoo a ntsebago. Yeo ke nnete. Yeo ke therešo. Bjale, o a tseba ga ke go tsebe, eupša a o a dumela Modimo o tseba gore o mang? Mdi. McGuire. O na le kgopelo ya gago. Eya gae o leboga Modimo.

O dira bjang? O motho yo moswa wa maatla.

198 Eupša go babja le bolwetši ga bo bebe motho. Ke ba bakae ba tsebago seo? [Phuthego e re, “Amene.”—Mor.] Re no tseba gore ga bo bebe motho.

199 “Ge o ka kgona go dumela ka pelo yohle ya gago le soulo yohle ya gago!” Asma yeo e tla go tlogela ge o ka dumela ka pelo yohle ya gago.

200 Bothata bja sefega, a o a dumela bo tla go tlogela, le wena, kgaetšedi, gomme o tla dirwa go fola? O kgwathile eng? O dikgato tše masomapedi go tloga go nna, goba go feta. O kgwathile Mong. Ke pipitlano, ya megalatšhika. O tla ba gabotse.

201 Se ke selo sa go hlomphega mosadi yo moswa yo a se emetšego. Yena ke mosetsebjje go otlologa. Ga ka ke ka tsoge ka bona mosadi. Eupša o tlišitšwe mo ke yo mongwe gape. Gomme se se mo tlišitšego mo, ebile ka gobane o kwele theipi ye ke e dirilego. Gomme o mo o nyaka kolobetšo ya Moya wo Mokgethwa. Seo ke tlwa a lego mo ka sona. Yeo ke therešo, mohumagadi yo moswa. Yeo ke nnete. Etle mo.

202 Morategi Modimo, a nke ngwana yo a emego mo, yo a phuletšego pele go tšwa leswiswing go ya Seetšeng, a nke a amogele Moya wo Mokgethwa; a ye legaeng la gagwe le baratiwa ba gagwe, a ba laetše dilo tše kgolo Jesu a mo diretšego. Amene.

Modimo a go šegofatše. Se belaele. Dumela.

203 Modimo o kgona go fodiša mehuta yohle ya letšhogo le (a o dumela seo?) le maemo a asma, le go go fodiša. A o dumela seo? Gona tloga, dumela ka pelo ya gago yohle. A nke Modimo a go šegofatše, ngwanešu.

204 O yo mogolo gakaakang? [Kgaetšedi o re, “Masometharo seswai.”—Mor.] O swanetše go tšwela ka ntle ga letšhogo leo pele ga botelele kudu, a ga o? Go ba le mehuta yohle ya ditlhaselo tša go lapa, le se sengwe le se sengwe se direga go wena. Eupša e go tlogetše bjale. Ee, mohlomphegi.

205 Modimo o fodiša letšhogo, bothata bja mogodu, gape. A o dumela seo? Gona eya o je se o se ratago. Jesu Kriste o go fodišitše.

206 A le a dumela ntle fao, yo mongwe le yo mongwe wa lena? [Phuthego e re, “Amene.”—Mor.]

207 Monna šole o dutše ka he—he hempe, o ntebeletše, ya, o lebeletše fase go hempe ya gagwe feela bjale. Ya. A o a dumela Modimo o kgona go fodiša bothata bja thatana, a kgona go go fodiša? O be o dumela nako yeo (a o be a sa?), nako yela ya go swana mošemane yo monnyane yo a fodišwa seemo sela sa asma. Eya gae, hani, o ya go fola, le wena, o a bona. Dumela ka pelo ya gago yohle.

208 Mohumagadi yo monnyane a dutšego kgauswi le mosadi wa gago fao, a o ka kgona go dumela mahlo a gago a tla fola, le wona? O a dumela Modimo o tla fodiša bothata bjoo bja leihlo? Phagamišetša seatla sa gago godimo ge e le se o bego o se rapelela. Le a bona?

Ba kgathile eng? Jesu Kriste Morwa wa Modimo.

209 A o a dumela? A o a dumela, lesogana? Modimo a ka kgona go fodiša seemo seo sa madi, a se lokiša, (a o ka dumela seo?) a tloša dilo tšeo tša bolwetši bja swikiri le go go fodiša. A o dumela seo? Eya o Mmotše o a se dumela, gomme eya.

210 Etna, mohlomphegi. O na le bothata bja mogodu. A o a dumela Modimo a ka kgona go bo fodiša, a bo fodiša? [Ngwanešu o re, “Ee, ke a dira.”—Mor.] Eya, e dumele; o tla fola, wa dirwa go felela.

211 Etna, tliša mošemane yo monnyane yo. Lebelela mo, morwa. Go tla ditsela tše ditelele. Dinako tše dingwe ke go fetoga ga bogodimo, go fetoga ga klaemete, go tla e dira, go fodiša seemo sa asma. Eupša go na le phodišo e tee ya nnete, Jesu Kriste Morwa wa Modimo. O file Morwa wa Gagwe, gore wa gago a fodišwe. A o dumela seo? Dumela ka pelo ya gago yohle, gomme e tla mo tlogela. O tla ba sekeng, monna wa go fola. Modimo a go šegofatše, kgaetšedi.

212 A o a dumela? A Modimo o sa dira dikgakgamatšo? [Phuthego e re, “Amene.”—Mor.] Tša go se hlalošega, tša go se kwešišagale, dilo tše batho ba ka se kwešišego gore e ka ba bjang, eupša e sa le therešo, a ga se? [“Amene.”] Bjale ke ba ba kae ba kwago, le go tseba ka moyeng wa gago, gore go swanetše go ba Sengwe mo seo se lego ka godimo ga kwešišo ya motho?

213 Bjale, ke nagana re beditše bonnyane batho ba lesometlhano ka mothalong wola, yo mongwe le yo mongwe wa bona; gomme ba bane, goba ba bahlano, tshela, ntle kua ka mothalong, ntle le dikarata tša thapelo, goba e ka ba eng ba be ba le ntle ka mothalong kua, ntle ka batheetšing kua. Eupša re thwi bjale motsotso o motee feela wa nako, ya go tswalela.

214 A O e dirile feela tlwa tsela ye A rilego O tla e dira? [Phuthego e re, “Amene.”—Mor.] Bjale ke ba bakae ba dumelago O a swana maabane, lehono, le go ya go ile, ba ba kwago Bogona bja Gagwe?



[“Amene.”] Bjale le bone Bogona bja Gagwe. Bjale mahlo a lena a bone, ditsebe tša lena di kwešišitše, gomme Modimo o tiišitše, pele ga mahlo a lena, Bogona bja Gagwe. Gomme seo o se kwago nako yohle, seo se go ahlolago ge o le phošo, le go go botša go se se dire, Modimo yoo wa go swana o tlile go bonagala go lena mo morago ga sekgalela se, ka go mediro ya Gagwe. Ke ba bakae ba rego “amene” go seo? [“Amene.”] Nnete, ke yona. Bjale O mo.

215 A go na le yo motee mo ka makgatheng a rena, yo a sego a ke a tsoge a ba Mokriste; a sego a tsoge a ba le boipolelo bjo bo itšego, ga se wa ke wa tsoge wa ya kerekeng? A o ka emela godimo, le go re, “Ke nyaka go ema, e sego go wena, modiredi; eupša ke nyaka go ema ge ke sa le ka Bogoneng bja Motho yo, Jesu Kriste, Yo e lego Moya wo Mokgethwa godimo ga rena bjale. Ke nyaka go ema le go re, ‘Ke Go nyaka o mpholose go tšwa dibeng tša ka’?” Seo ke sohle ke nyakago o se dira, go no ema godimo, gomme seo se tla hlatsa. Seo ke sohle re nago le nako go se dira. Go re, “Ke nyaka go ba Mokriste.” Ema ka maoto a gago, gomme morago dula thwi fase morago.

216 A go yo motee ka moagong? Ke ba bakae ba lego ka moagong? Ga ka swanela go bolela, “A go yo motee?” gobane mo go ka no ba go feta botee. Ke ba bakae ka moagong ba tla emago thwi bjale, le go re, “Ke fošitše, Modimo. Ntebalele. Ke tla phagamela godimo go Go fa bopaki go re ke fošitše. Ke tla dula fase ge ke le mo ka Bogoneng bja Gago. Ke tla dula fase”? E no ema godimo.

217 A go yo motee, a go na le go feta yo motee? Seatla se tee. Modimo a go šegofatše, lesogana. A go na le yo mongwe? Modimo a go šegofatše. A go na le yo mongwe? Modimo a go šegofatše. Modimo a go šegofatše. Modimo a go šegofatše, ngwanešu. A go na le? Modimo a go šegofatše, morago moo. A go na le yo mongwe, “Ke fošitše. Modimo, ntebalele”? Modimo a go šegofatše, mohlomphegi. “Ke fošitše. Ke—ke maswabi, Morena.” Modimo a go šegofatše. Modimo a go šegofatše. Modimo a go šegofatše.

218 A go na le yo mongwe yo a bilego le go gonona ka bodiredi bjo, gomme o kgodišegile bjale ke therešo? Phagamela godimo moo, gomme o re, “Modimo, ntebalele.” E no phagamišetša seatla sa gago godimo, e re, “Ke—ke be ke gonona gannyane, Ngwanešu Branham; yohle e ile bjale.” Phagamiša seatla sa gago. Ga go o tee? Ke a le leboga.

219 Ke ba bakae ba dumelago Le? E ka se kgone go ba nna; eupša ke Kriste, Morwa wa Modimo. Ke a le leboga. Gona le tla bona dilo tše kgolokgolo go feta tše di dirwa, ge feela le ka dumela. E nong go dula le Kriste. Ke tla dira bokaonekaone bja ka go dula thwi le Yena, nnamong.

220 Bjale ke ba bakae mo ba babjago le go hloka, phagamiša seatla sa gago, “Nna ke—nna ke a babja, Ngwanešu Branham, nna ke a hloka”? Le a bona, e no lebelela batho. Bjale a o tla dira

se le go no dumela lentšu la ka bontši bjo? A re beaneng diatla seng sa rena, ge ke nno swara diatla tša ka ntle go leba go lena.

A re rapeleng.

221 Morategi Modimo, ke tliša go Wena batheeletši ba bannyane ba, morago ga sekgalela se, moo re kwelego le go bala Lentšu la Modimo. Re a tseba gore nthathana ye nngwe le ye nngwe ke Therešo, ka gobane ke Lentšu la Gago. Ga se re le dumele feela bjale go ba therešo; re a tseba ke therešo. Re Go bone, Morena, o dira se sengwe se se tla dirago batho go tseba gore go sa na le. . . Ntle le kgakgamatšo ya—ya lefase, le sekgoba, le melao ya tlhago ya Modimo, re kgona go bona mo fao molao wola wa lehu o šomago ka mmeleng wa motho, fao saense e paletšwego go—go fodiša ka diphatišišo tša bona. Gomme, Morena, re leboga batho bao. Ga re ba nyenyefatše le ka mokgwa ofe. Re a ba leboga. Eupša, Morena, ge go etla go lefelo mo ba se sa kgonago go dira, bjale re bona seatla sa Gago se segolo se etla ka gare; go tseba gore ga go motho a ka kgonago go ba fodiša, ka gobane o tla ba ngaka, goba o swanetše go tšea kalafi tsoko. Eupša go bona Morwa wa Modimo a etla fase, gomme yoo o dirile tshepišo, yeo bohle re dumelago ka go yona.

222 Gomme motho yo mongwe le yo mongwe o swaretše seatla tša bona godimo, yo a bego a sa phološwa, gomme—gomme a nyaka go phološwa. Modimo, se sengwe se sebotitše pelo ya bona. Bangwe ba bona ba rile “ba be ba fošitše,” mohlomongwe ba kgelogile gomme ba nyaka go tla morago. Ke a rapela gore O tla tšeela yo mongwe le yo mongwe morago. Ka gobane ba a tseba, Morena, le go tseba. . . Ba bantši ba bona ba ka no ba ba ntsebile, goba ka nna, mengwaga ye, le go tseba gore ga go selo se sebotse ka go monna, gomme gagolo nna. Go ka kgonega bjang go ba selo e ka ba sefe se se botse? Eupša efela ba bone Lentšu lela, le Modimo a le tshepišitšego, a le dira go bonagala. Ba kgodišegile gore Ke Therešo. Ba Le amogetše.

223 Ba bantši mo nka se kgone go ba tliša sefaleng. Gomme, Tate, Wena o a ntlhatsetša, ga se nke ka tsoge ka bolela gore e tla ba se sengwe se nka kgonago go se dira, go feta go neela nnamong go Wena, le go dira Wena go ntšea go tloga tseleng gomme wa bea Moya wa Gago ka kua go šoma. Bjale, Tate, go boneng gore motho yo motee a ka kgona go dira seo, yo mongwe a ka kgona go se dira, ke a rapela gore yo mongwe le yo mongwe ba nago diatla tša bona di beilwe godimo ga yo mongwe le yo mongwe, yoo a babjago le go tlaišega, o tla fodišwa feela ka nako ye.

224 Dumelela Moya wo Mokgethwa wo mogolo go feta go kgabola moago feela bjale le go dira yo mongwe le yo mongwe a fole. Phološa yo mongwe le yo mongwe, Morena. Efa boitemogelo bjo bobjalo. Tšhollela Moya wo Mokgethwa ntle, Morena, godimo ga batheeletši ba. Oo, re lebeletše go Wena go dira dilo tše dikgolo

beke ye e tlogo ye. E no dumela go be bjalo, Morena, thwi bjale, Leineng la Jesu Kriste.

<sup>225</sup> Bjale bohle a re emeng ka maoto a rena. A o dumela ka pelo ya gago yohle? Bjale ke a makala ge eba kgaetšedi wa rena, go piano kua, a ka re fa kho—kho—khote ye nnyane ya ye, “Ke Tla Mo Tumiša. Ke Tla Mo Tumiša.” A le kwele yeo? Bjale a re e opeleng, mmogo. Bjale re tla holofela go kopana le lena gosasa mantšiboa. Bjale re tla phatlalala semmušo, feela mo nakwaneng, eupša ke nyaka go opela pina ye le lena. Go lokile, a re yeng.

Ke tla Mo tumiša, (a re phagamišeng diatla tša rena) ke tla Mo tumiša,  
Tumišang Kwana ye e bolaetšwego badiradibe;  
Mo feng letago, lena batho bohle,  
Gobane Madi a Gagwe a hlatswitše go tloša patso ye nngwe le ye nngwe.

<sup>226</sup> A re inamišeng dihlogo tša rena bjale bakeng sa thapelo ya go phatlalala. Go lokile, Ngwanešu Jewel Rose o ya go re phatlalatša. Modimo a go šegofatše, Ngwanešu Rose, ge re sa na le tša rena . . .



*KGAKGAMATŠO* NST65-0117  
(A Paradox)

Molaetša wo ka Ngwanešu William Marrion Branham, setlogong o abilwe ka Seisimane ka Lamorena morago ga sekgalela, Janaware 17, 1965, e le wa Full Gospel Business Men's Fellowship International ka Westward Ho Hotel ka Phoenix, Arizona, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2019 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)